


DS  
752  
S78  
1774  
V. 2



EAST ASIAN LIBRARY  
UNIVERSITY OF TORONTO LIBRARY  
130 St. George Street  
8th FLOOR  
TORONTO, CANADA M5S 1A5









元朝名臣事略卷五

元 蘓 天 爵 撰

中書耶律文正王

王名楚材字晉卿遼東丹王托雲八世孫金尚書右  
丞文獻公履之子爲燕京行省員外郎歲乙亥城降  
遂屬國朝扈從征伐諸國辛卯拜中書令癸卯薨年  
五十五

公以明昌元年六月二十日生文獻公通術數尤邃于  
太元私謂所親曰此子吾家千里駒也他日必成偉器



且當爲異國用因取左氏之楚雖有材晉實用之以爲

名字

平章宋公撰神道碑

公生三歲而孤母夫人楊氏誨獎備至稍長知力學十

七書無所不讀爲文有作者氣

神道碑

金制宰相子得試補省掾公不欲就章宗特敕就試則

中甲科考滿授同知開州事貞祐甲戌宣宗南渡丞相

完顏承暉留守燕京行尚書省事表公爲左右司員外

郎明年京城不守遂屬國朝

神道碑

太祖素有併吞天下之志嘗訪遼宗室近族至是徵詣



行在入見上謂公曰遼與金爲世讎吾與汝已報之矣  
公曰臣父祖以來皆嘗北面事之旣爲臣子豈敢復懷  
二心讎君父耶上重其言處之左右以備諮訪

神道碑

已卯夏六月大軍征西禡旗之際雨雪三尺上惡之公  
曰此克敵之象也

神道碑

庚辰上駐蹕于西域塔實干城時二月五月朔微月皆  
見西南公因別造庚午元歷進之其進表云漢唐以  
來其書大備經元創法無啻百家其氣候之早晏朔望  
之疾徐二曜之盈衰五星之伏見疎密無定先後不同



蓋建都立國之各殊或涉歷歲年之漸遠不得不爲差也唐歷八徙宋歷九更良以此夫金曰大明百年纔經一改此去中原萬里以昔程今昔密今疎東微西著以地遙而歲久故時異而時同今以二月五月朔微月皆見于西南較之于歷悉爲先天誠所未聞而未見也若夫漢唐以來歷算之書備矣俱無此說以法論之月惟至晦則一日不見是二十九日有月也豈聖人建月之意本諸此乎今以星歷考之是年正月四月雖皆爲小盡蓋亦未有朔日見月者也

張都燕  
居叢談



是歲冬大雷上問公公曰蘇勒坦當死中野已而果然

蘇勒坦回鶻王稱也

神道碑

國初未有歷學而回鶻人奏五月望夕月蝕公言不蝕

及期果不蝕明年公奏十月望夜月蝕回鶻人言不蝕

其夜月蝕八分上大異之曰汝于天上事尚無不知况

人間事乎

神道碑

又叢談云庚辰歲公在塔實干城

甚子正時在宵中是夜侯之未盡初更而月已蝕矣蓋大明之子正中國之子正也西域之初更西域之初更也西域之初更未盡時焉知不為中國之子正乎隔幾萬里之遠僅逾一時復何疑哉此唐一行時有里差之說謂千里互差一時者是也二書所載不同



壬午夏五月長星見西方上以問公公曰女直國當易主矣逾年而金主死于是每將出征必令公豫卜吉凶

上亦用羊髀骨以符之

神道碑

行次東印度國鐵門關侍衛者見一獸鹿形馬尾綠色而獨角能爲人言汝軍宜早迴上怪而問公公曰此獸名角端日行一萬八千里解四夷語是惡殺之象蓋上天遣之以告陛下願承天心宥此數國人命實陛下無

疆之福卽日下詔班師

神道碑

丙戌冬十一月靈武下諸將爭掠子女財幣公獨取書



數部大黃兩駝而已既而軍士病疫惟得大黃可愈所

活幾萬人

神道碑

燕京多盜至駕車行刼有司不能禁時睿宗監國命中使偕公馳傳往至分捕得之皆勢家子其家人輩行賂求免中使惑之欲爲覆奏公執以爲不可曰信安咫尺未下若不懲戒恐致大亂遂刑一十六人京城帖然

神道碑

已丑太宗卽位公定冊立儀禮皇族尊長皆令就班列拜尊長之有拜禮蓋自此始諸國來朝者多以冒禁應



死公言陛下新卽位願無汚白道子從之蓋國俗尚白

以白爲吉故也

神道碑

又李微撰墓誌云巳丑秋公奉遺詔立太宗擇定八月二十二日尚

猶豫不決公曰此社稷大計若不早定恐生大變睿宗曰再釋曰如何公曰過此日皆不吉至日公與睿宗翼

太宗登寶位

時天下新定未有號令所在長吏皆得自專生殺少有

忤意則刀鋸隨之至有全室被戮襁褓不遺者而彼州

此郡動輒興兵相攻公首以爲言皆禁絕之

神道碑

自太祖西征之後倉廩府庫無斗粟尺帛而中使伯特

等僉言雖得漢人亦無所用不若盡去之使草木暢茂



以爲牧地公卽前曰夫以天下之廣四海之富何求而  
不得但不爲耳何名無用哉因奏地稅商稅酒醋鹽鐵  
山澤之利周歲可得銀五十萬兩絹八萬匹粟四十萬  
石上曰誠如卿言則國有餘矣卿試爲之乃奏立十路  
課稅所設使副二員皆以儒者爲之如燕京陳時可宣  
德路劉中皆天下之選因時時進說周孔之教且謂天  
下雖得之馬上不可以馬上治上深以爲然國朝之用

文臣蓋自公發之

神道碑

先是諸路長吏兼領軍民錢穀往往恃其富强肆爲不



法公奏長吏專理民事萬戶府總軍政課稅所掌錢穀  
各不相統攝遂爲定制權貴不能平燕京路舒穆魯咸  
達布激怒皇族俾專使來奏謂公悉用南朝舊人且渠  
親屬在彼恐有異志不宜重用且以國朝所忌誣構百  
端必欲置之死地事連諸執政同列爲之股慄曰何必  
強爲更張計必有今日事公曰自立朝廷以來每事皆  
我爲之諸公何與焉若果獲罪自我當之上察其誣怒  
逐來使不數月會有以事告咸達布者上特命公鞠治  
公奏曰此人倨傲無禮狎近羣小易以招謗今方有事



于南邦他呂治之亦未晚也

神道碑

辛卯秋上至雲中諸路所貢課額銀幣及倉廩物斛文簿具陳于前悉符元奏之數上曰卿不離朕左右何使錢幣流入如此不審南國復有卿比者否公曰賢于臣者甚多以臣不才故留于燕邸卽日授中書省印俾領其事事無巨細一以委之

神道碑

宣德路長官太傅托噶失陷官糧萬餘石恃其勲舊密奏求免上問中書知否對曰不知上叱出使白中書省償之仍敕今後凡事先白中書然後奏聞

神道碑



中貴克斯布哈奏撥戶一萬以爲採鍊金銀栽種蒲萄等戶公言太祖有旨山後百姓與本朝人無異兵武所出緩急得用不若將河南殘弱貸而不誅可充此役且以實山後之地上曰卿言是也又奏諸路民戶今已疲乏令土居蒙古回鶻河西人等與所在居民一體應輸賦役皆施行之

神道碑

壬辰春車駕至河南詔陝洛秦虢等州山林洞穴逃匿之人若迎軍來降與免殺戮或謂此輩急則來附緩則復資敵耳公奏給旗數百面悉令散歸已降之郡所活



不可勝數

神道碑

國制凡敵人拒命矢石一發則殺無赦汴京垂陷首將蘇布特遣人來報且言此城相抗日久多殺傷士卒意欲屠之公馳入奏曰將士暴露凡數十年所爭者土地人民耳得地無民將焉用之上未疑而決復奏曰凡弓矢甲仗金玉等匠及官民富貴之家皆聚此城中殺之則一無所得是徒勞也上始然之詔除完顏氏一族外餘皆原免時避兵在汴者戶一百四十七萬仍奏選工匠儒釋道醫卜之流散居河北官爲給贍其後攻取淮



漢諸城因為定例

神道碑

初汴京未下奏遣使入城索取孔子五十一孫元措襲

封衍聖公令收拾散亡禮樂人等及取名儒梁涉等數

輩於燕京置編修所平陽置經籍所以開文治

神道碑又按

遺山元公上書云夫自漢唐以來言良相者在漢則有蕭曹丙魏在唐則有房杜姚宋數公者固有致太平之功而當時百執事之人毗助贊益者不為不多蓋天下大器非一人之力可舉而國家所以成就人材者亦非一曰之事也必藉學校教育父兄淵源師友講習三者備而後可譬如修明堂總章必得棟楠豫章之材豫為儲蓄數十年之間乃能備一旦之用非若起尋丈室屋構櫨根楔雜出於榆柳柏槐可以朝求而暮至也竊見南中大夫士歸河朔者所在有之聖者之後如衍聖孔公耆舊如馮內翰叔獻梁都運斗南高戶部唐卿王延



州從之時輩如平陽王狀元綱東明王狀元鶚濱人王  
賁臨淄人李浩秦人張徽楊奐李庭訓河中李獻卿武  
安樂夔固安李天一翼沛縣劉汝翼齊人謝良弼鄭人李  
大鵬山西魏璠潭人李恒簡李禹翊燕人張聖俞太原  
張緯李謙翟致君張德輝高鳴孟津李蔚真定李治相  
人胡德珪易州敬鈺雲中李微中山楊果東平李昶西  
華徐世隆濟陽張輔之燕人曹居一王鑄渾源劉祁及  
其弟郁李同平定賈廷揚楊恕濟南杜仁傑潞水張仲  
經虞鄉麻草東平商挺漁陽趙著平陽趙維道汝南楊  
鴻河中張肅河州句龍瀛東勝程思遇及其從弟思忠  
凡此諸人雖其學業行詣參差不齊要之皆天民之秀  
有用於世者也百年以來教育講習非不至而其所成  
就者無幾喪亂以來三四十人而止矣乃幸不死於兵  
造物挈而授之維新之朝豈無意乎誠以閣下之力使  
脫奔走之役而儲之他日求百執事之人惟左右采而  
取之獨不能少助閣下蕭曹丙魏房杜姚宋之功乎  
時河南新破被俘擄者不可勝計及聞大軍北還逃去



者十八九有詔停留逃民及資給飲食者皆死無問城郭保社一家犯禁餘並連坐由是百姓惶駭雖父子兄弟一經俘擄不敢正視逃民無所得食踣死道路者踵相躡也公從容進說曰十餘年間存撫百姓以其有用故也若勝負未分慮涉攜貳今敵國已破去將安往豈有因一俘囚罪數百人者乎上悟詔停其禁

神道碑

金國旣亡惟秦鞏等二十餘州連歲不下公奏吾人得罪逃入金國者皆萃於此其所以力戰者蓋懼死耳若許以不殺不攻而自下矣詔下皆開門山降朞月之



間山外悉平

神道碑

甲午詔括戶口以大臣呼圖克領之國初方事進取所  
降下者因以與之自一社一民各有所主不相統屬至  
是始隸州縣朝臣共欲以丁爲戶公獨以爲不可皆曰  
我朝及西域諸國莫不以丁爲戶豈可捨大朝之法而  
從亡國政耶公曰自古有中原者未嘗以丁爲戶若果  
行之可輸一年之賦隨卽逃散矣卒從公議時諸王大  
臣及諸將校所得戶口往往寄留諸郡幾居天下之半  
公因奏括戶口皆籍爲編民

神道碑



已未朝議以回鶻人征南漢人征西以爲得計公極言其不可曰漢地西域相去數萬里比至敵境人馬疲乏不堪爲用況水土異宜必生疾疫不若各就本土征進似爲兩便爭論十餘日其議遂寢

神道碑

丙申秋七月呼圖克以戶口來上議割分諸州郡分賜諸王貴族以爲湯沐邑公曰尾大不掉易以生隙不如多與金帛足以爲恩上曰業已許之公曰若樹置官吏必自朝命除恒賦外不令擅自徵歛差可久也從之是歲始定天下賦稅每二戶出絲一斤以供官用五戶出



絲一斤以與所賜之家上田每畝稅三升半中田三升  
下田二升半水田畝五升商稅三十分之一鹽每銀一  
兩四十斤已上以爲永額朝臣皆謂太輕公曰將來必  
有以利進者則已爲重矣

神道碑

國初盜賊充斥商賈不能行則下令凡有失盜去處周  
歲不獲賊令本路民戶代償其物前後積累動以萬計  
及所在官吏取借回鶻債銀周年則倍之次年則併息  
又倍之謂之羊羔利積而不已往往破家散族至以妻  
子爲質終不能償公請于上悉以官銀代還凡七萬六



于錠仍奏定今後不以歲月近遠予本相俸更不生息

遂爲定制

神道碑

侍臣托歡奏選室女敕中書省發詔行之公持之不下  
上怒召問其故公曰向所刷二十八人尚在燕京足備  
後宮使令而托歡傳旨又欲徧行選刷臣恐重擾百姓  
欲覆奏陛下耳上良久曰可遂罷之又欲于漢地拘刷  
牝馬公言漢地所有布絲五穀耳非產馬之地若今日  
行之後必爲例是徒擾天下也乃從其請

神道碑

丁酉汰三教僧道試經通者給牒受戒許居寺觀儒人



中選者則復其家公初言僧道中避役者多合行選試

至是始行之

神道碑

時諸王貴戚皆得自起驛馬而使臣猥多馬悉乏則豪奪民馬以乘之城郭道路騷動所至則需索百端供饋稍緩輒被箠撻館人不能堪公奏給牌劄及定飲食分例其弊始革

神道碑

諸路官府自爲符印僭越無度公奏並仰中書依式鑄

造由是名器始重

趙衍撰行狀

戊戌天下大旱蝗上問公以禦之之術公曰今年租賦



乞權行倚閣上曰恐國用不足公曰倉庫見在可支十年許之國初籍天下戶得一百四萬至是逃亡者十四五而賦仍舊天下病之公奏除逃戶三五十萬民賴以

安

神道碑

燕京呼圖克扎木陰結權貴以銀五十萬兩撲買天下差發實埒發鼎者以銀二十五萬兩撲買天下係官廊房地基水利猪雞劉廷玉者以銀五萬兩撲買燕京酒課又有回鶻以銀一百萬兩撲買天下鹽課至有撲買天下河泊橋梁渡口者公曰此皆奸人欺下罔上爲害



甚大咸奏罷之嘗曰興一利不若除一害生一事不若減一事人必謂班超之言蓋平平耳千古之下自有定

論神道碑

公自庚寅年定課稅所額每歲銀一萬錠及河南旣下戶口滋息增二萬二千錠而回鶻溫都爾哈瑪爾撲買課稅增至四萬四千錠公曰雖取四十四萬亦可得不過嚴設法禁陰奪民利耳民窮爲盜非國之福而近侍左右皆爲所陷上亦頗惑衆議欲求試行之公反復爭論力不能奪乃太息曰撲買之利旣興必有躡跡而篡



其後者民之窮困將自此始矣

神道碑

公正色立朝不爲少屈欲以身殉天下每陳國家利病

生民休戚辭色懇切上曰汝又欲爲百姓哭耶

神道碑

上素嗜酒晚年尤甚公數諫不聽乃持酒槽之金口曰

此鐵爲酒所蝕尚致如此況人之五臟有不損耶上悅

賜以金帛仍敕左右進酒三鍾而止

神道碑

辛丑春二月上疾篤脉絕諸藥不能療皇后不知所以

召公問之時奸臣竊政鬻獄賣官專令回鶻控治諸國

公對曰今朝廷用非其人天下罪囚必多冤枉故天變



屢見宜赦天下因引宋景公熒感退舍之事以爲證后  
亟欲行之公對曰非君命不可頃之上少蘇后以爲奏  
上不能言首肯而已赦發脉復生冬十二月上勿藥已  
久公以太乙數推之不宜畋獵奏之數四左右皆曰若  
不騎射何以爲臘五日而崩

行狀又汲郡王公文集云太宗仁厚有餘言詞極

寡服御儉素不尚華節委任大臣略無疑二性頗樂飲  
及御下聽政不易常度當時政歸臺閣朝野歡娛前後  
十年號稱無事

壬寅春后以儲嗣問公曰此非外姓臣所敢知自以太  
宗遺詔在遵而行之社稷幸甚

墓誌



溫都爾哈瑪爾方以貨取朝政執政者亦皆阿附惟憚  
公沮其事則以銀五萬兩賂公公不受事有不便于民  
者輒中止之時后已稱制則以御寶空紙付溫都爾哈  
瑪爾令從意書填公奏曰天下先帝之天下典章號令  
自先帝出必欲如此臣不敢奉詔尋復有旨溫都爾哈  
瑪爾奏準事理令史若不書填則斷其手公曰軍國之  
事先帝悉委老臣令史何與焉事若合理自是遵行若  
不合理死且不避況斷手乎后以公先朝勲舊曲敬憚

焉

神道  
碑



公天資英邁迥出人表雖案牘滿前左酬右答咸適其  
當平居不妄言笑及一被接納則和氣溫溫令人不能  
忘素不嗜酒間與賓僚宴集終日端坐平生不治生產  
及其薨也人有譖之者曰公爲相二十年天下貢奉皆  
入私門后使衛士視其庫藏惟名琴數十張古今書畫  
金石遺文數千卷而已篤于好學不舍晝夜嘗誡其諸  
子曰公務雖多晝則屬官夜則屬私亦可學也

神道碑  
又陵

川郝公文集云當太宗臨御之時耶律楚材爲相定稅  
賦權商課分郡縣籍戶口理獄訟別軍民設科舉推恩  
肆赦方有志于天下而一二不逞之人投隙抵罅相與  
排擯百計攻訐乘宮闈違豫之際恣爲矯誣乃使楚材



憤惋  
以死

國家承大亂之後天綱絕人理滅所謂更造夫婦肇有  
父子者信有之矣加以南北之政每每相戾其出入用  
事者又皆諸國之人言語之不通趨向之不同當是之  
時而公以一書生孤立于廟堂之上而欲行其所學憂  
憂乎其難哉幸賴明天子在上諫行言聽故奮袂直前  
力行而不顧然而其見於設施者十不能二三而天下  
之人固已均受其賜矣若此時非公則人之類又不知

其何如耳

神道  
碑



中書楊忠肅公

公名惟中字彥誠宏州人國初奉使西域歲乙未用  
兵淮上領軍前行中書省癸卯拜中書令壬子出爲  
河南經略使遷陝右四川宣撫使己未王師伐宋拜  
江淮宣撫使是歲薨年五十五

金末公以孤童子事太宗自知讀書有膽畧太宗器之  
賜冠銜命使西域三十餘國宣暢威靈欵布條要俾皆  
籍戶屬吏數年而歸帝乃有大用意

郝文忠公  
撰神道碑

庫春太子伐宋命公于軍前行中書省克宋棗陽光化



等軍光隨郢復等州及襄陽德安府得名士數十人收  
集伊洛諸書載送燕都立周子祠建太極書院俾師儒

趙復等訓授公遂知性理學慨然欲以道濟天下

神道碑

又周子祠堂記云天歷初國子祠祀之禮盛于江左而  
未至于河朔公領中書始嗜其學乃建太極書院于永  
郡立周子祠以二程晁楊游朱六子配食歲時釋奠之  
刻太極圖通書西銘于祠壁請雲夢趙復為師儒右北  
平王粹佐之選俊秀  
之有器度者為學生

耶律楚材罷遂以公為中書令太宗崩太后稱制公以

一相負任天下

神道碑

定宗即位平陽道斷事官色辰橫恣不法詔公宣慰公



按誅之一府僚屬莫不健其決

神道碑

金亡恒山公武仙潰于鄧州其餘黨散入太原真定間據大明川用金開興年號衆至數萬出沒劫掠數千里詔會諸道兵討之不克公仗節開諭降其渠帥其黨悉

平

神道碑

憲宗即位上以太弟鎮金蓮川開府承制封拜奏公爲河南道經略使初滅金以監河橋萬戶劉福爲河南道總管盡有金源故地福貪鄙殘酷害虐遺民二十餘年公至召福聽約束福稱疾不至公命設大槌于坐復召



之使謂福曰爾不奉詔吾以軍法行事福以數千人擁衛見公公卽握大槌擊踣之數日福死百姓鼓舞稱快

河南太治

神道碑

遷邾右四川宣撫使以諸軍帥橫侈病民郭千戶者尤甚殺人之夫而奪其妻其子告公馘之以徇關中肅然公語人曰某非好殺國家紀綱不立致此輩賊虐良民無所控告不去不仁何以爲仁乎

神道碑

歲己未上總統東師奏公爲江淮荆湖南北等路宣撫使俾建行臺以先啓行宣布恩信蒙古漢帥並聽制節



師還薨于蔡州公出入柄用者三十年天下畏其勇而

懷其仁

神道碑

皇元誕膺天命奄奠區夏經略海外旣一再傳始究內  
治用公爲相與天下休息乃恢張規模維繫綱紀誅鉏  
兇渠愛養黎獻整頓衣冠收藏典籍斯民得以迭續遺  
命吾道賴以不亡天下復見平康之治繫公力焉

神道碑



臣倪思淳恭校



元朝名臣事略卷六

元 蘇 天 爵 撰

總帥汪義武王

王名世顯字仲明鞏昌人金季以戰功擢千夫長累遷鞏昌府便宜總帥金亡踰年始屬國朝職仍舊尋賜金符伐蜀有功癸卯歲卒年四十九

公系出翁觀族貞祐二年西北艱飢階戰功起家爲千夫長八轉領同知平涼府事正大四年領隴州防禦使進征行從宜分治陝西西路行六部郎中西南調度窘



迫公發家資率豪右助邊鄰郡效之軍餉以之不絕六年以鞏州衝要之地升鞏昌府改兼治中轉同知兼參議帥府機務是時所在殘滅饑疫薦臻公與便宜總帥完顏仲德擁將士吏民出保石門九年仲德勤王東下公拜便宜總帥制旨大約屬以社稷爲念公感且憤至于糧械莫不精贍明年京城變郡縣風靡公獨爲之堅守越三年猶安堵如故而戰攻不弛謂其衆曰宗祀已矣吾何愛一死千萬人之命懸于吾手平居享高爵厚祿死其分也餘者奚罪與其自經于溝瀆姑殉一時之



節孰若屈己紓斯人之禍會皇子奎騰駐兵城下率僚  
佐耆老持牛羊酒幣迎謁焉皇子曰吾征討有年所至  
皆下汝獨爾爾何也對曰有君在上賣國市恩之人諒  
所不取皇子大悅勅其下絲髮無所犯蓋乙未冬十月  
四日也旦詣行帳寵之以章服職仍故卽日南征鳩士

馬截嘉陵蹴大安未幾凱旋疊承獎賚

楊文憲公撰神道碑又蜀郡

虞公文集云國家龍興朔漠威行萬方金源曰蹙志士  
守者或戰死死且盡不能成軍山東西之間豪傑並起  
據保城壁大抵非金署置之舊鞏昌汪氏據高制遠統  
郡縣數十勝兵數萬號曰便宜都總帥柵石門爲金守  
者三年及我兵攻鞏昌則金亡已三歲矣汪氏猶爲金  
發喪登俾哭王遂因皇子奎騰以自歸太宗察其誠仍



以便宜都總帥鎮故地取蜀之役資糧甲兵之賦終始  
畢給功多之紀他將鮮儷焉此諱世顯者所以封隴右  
王也王有子七人孫十有九人多居將相官封公者九  
人傳五世兄弟子孫百八十餘人總軍鞏昌者既世其  
職餘多大官

丙申備前鋒進攻大理安南田楊諸蠻結陣來拒公麾

輕騎五百撓之衆亂首尾不相藉潰圍出與南將曹將

軍潛兵作犄角計公單騎往突之格殺數十人黎明軍

合殪其主將皇子嘉歎之賜名馬佩刀公退語所部曰

吾已撤彼之藩籬行寢其堂奧矣

神道碑

丁酉春入武信城全獲府庫遂蹂資普

神道碑



戊戌軍葭萌之南時宋將依山爲柵公選數百騎奪山而入多所俘殺得其輜重乘勝赴資州壁山間識公旌旗驚怖奔逸鈔嘉定峨嵋以歸

神道碑

己亥秋俾隸塔海公節制道險霖雨阻潦攀木緣磴破開州聞蜀軍列萬州南岸公伺夜伏兵上流舟北岸以疑之旣而密由上流鼓革舟而下襲破之追奔逐北直抵夔峽公返而蹂之幾無噍類拔巫山與援軍遇復勦三千餘級比春分掖江引還及涪州修浮梁信宿而辨以濟南道之師環攻崇慶守者開門延敵他將莫能支



公提戈首出人服其膽勇漸力併以拔其城天大暑乃  
罷秋覲帝數其功賜金符公拜謝曰實陛下威德所致

臣何預焉上樂其知體首肯者再四

神道碑

辛丑蜀師陳隆之自稱百萬衆馳書索戰十月五日公  
略地成都傳城而陣彼屢戰屢却堅壁不出公曉以禍  
福十二日夜田顯縋城投款覺之公曰事急矣叱梯城  
入救軍民從顯而出者七十餘口獲陳隆之斬之五日  
公領精銳五百擣漢州州兵三千出戰城閉盡陷三日  
軍薄城又三日克之露布以聞皇子擊節嘆賞仍賜田



顯錢物

神道碑

癸卯春公且疾忽被召卽戒首途旣見賜虎符擢便宜  
總帥手札付秦鞏定西金蘭洮會環隴慶陽平涼順德  
鎮戎原階成岷疊西資等二十餘州事無鉅細惟公決  
裁以憂深責重疾再作竟不起

神道碑

公器局宏遠天資仁孝奉養太夫人斯須靡忘征南得  
旨酒不遠數千里載歸以備滫瀡處喪不御酒食劬勞  
之日必致齋薦祭喜儒術聞介然之善應接無少倦罷  
羈人寒士至解衣推食生館死殯各得其所還自蜀輦



書數千卷而圖畫半之士卒必與同甘苦如父兄之于子弟然臨陣整肅無敢干者憫新民未輯刑清役寡縱所不免猶度力緩期不至急暴上下相安不聞告訐或有牽連議縱寬釋同屬異主者多盡力購聚之每事先立規程而後處之以及訟庭驛舍則靜若隆平時休沐對客命觴雅歌投壺而已燕居逸遊若不勝衣遇敵先登搴旗斬將勇壓三軍雖古名將無以加矣

神道碑

萬戶嚴武惠公

公名實字武叔泰安長清人金季據東土歲庚辰籍



所部州民來歸太師國王承制授金紫光祿大夫行  
尚書省事甲午朝于和林授東平行軍萬戶庚子薨  
年五十九

公幼警悟略知讀書及長志節豪宕不治生產爲人美  
儀觀喜交結好施與落魄里社間屢以事被繫俠少輩  
愛慕之多爲出死力以故得脫去

遺山元公  
撰神道碑

癸酉秋國兵破中夏已而北歸東平行臺調民爲兵以  
公爲衆所伏署百夫長明年春泰安張汝楫據靈巖遣  
別將攻長清公破走之以功授長清尉戊寅六月攝長



清令八月宋人取益都乘勝而西行臺檄公備芻糧爲  
守禦計公出督租比還而長清陷尋以兵復之有譖于  
行臺者謂公與宋有謀行臺疑公以兵圍之公挈老幼  
壁青巖依益都主將以避之宋因以公爲濟南治中分  
兵四出所至無不下于是太行之東皆公所節制矣

碑

神道

庚辰三月河南軍攻彰德守將單仲力不支數求公救  
公請于主將主將逗遛不行公獨以兵赴之比至而仲  
被擒公知宋不足恃七月謁太師國王于軍門挈所部



彰德大名磁洛恩博滑濬等州戶三十萬以獻太師承制拜公金紫光祿大夫行尚書省事其年進攻曹濮單

三州皆下

神道碑

偏將李信留鎮青崖嘗有罪懼誅乘公出征叛降于宋公兄及夫人杜氏皆遇害辛巳公以兵復青崖摘信誅之進攻東平守將和立剛棄城走公入居之

神道碑

壬午宋將彭義斌說青崖晁海叛公之家人復被略去義斌軍西下郡縣多爲所脅乙酉四月遂圍東平公間遣人會大將博囉罕軍軍又不至城中食且盡乃與義



斌連和義斌亦欲藉兵取河朔而後圖之請以兄事公  
時麾下衆尚數千義斌不之奪而青崖所掠則留不遣  
七月義斌下真定道西山與博囉罕等軍相望分公以  
帳下兵陽助而陰伺之公知勢之迫卽速趣博囉罕軍  
而與之合戰始交宋兵崩潰乃擒義斌不匝月先所失  
部分盡復之是冬郡王岱遜取彰德明年取濮東平又  
明年太師攻益凡公之功所在皆爲諸道都之冠  
神道碑  
庚寅四月朝于牛心之帳殿天子賜之坐宴享終日錫  
公虎符寵以不名又數數目公顧謂侍臣言若嚴公者



真福人矣

神道碑

甲午朝于和林城授東路行軍萬戶偏裨賜金符者八人初公之所統有全魏十分齊之三魯之九及是畫境之制行公之地於魏則別爲大名又別爲彰德齊與魯則復以德堯濟鄆歸于我

神道碑

丁酉九月詔命公毋出征伐當其時公以百城長東諸侯者十五年矣始於披荆棘扞豺虎敝衣糲食暴露風日挈溝壑轉徙之民而置之衽席之上以勸耕稼以豐委積公帑所積盡于交聘燕享祭祀賓客之奉而未嘗



私貯之辟置俊良汰逐貪墨顧指所及謁蹶奉命不三  
四年由武城而南新泰而西行於野則知其爲樂歲出  
于塗則知其爲善俗觀于俗則知其爲太平官府而公  
之心力亦已盡矣上亦雅知公不便鞭馬念其功而憫  
其勞優卹如此

神道碑

公病風痺久人有勸迎良醫者笑曰人豈不死耶得無  
疾痛以沒足矣

神道碑

公旣握兵柄顧生殺時年已長經涉世故乃更折節自  
厲間亦延致儒士道古今成敗至前人良法美意所以



仁民愛物者輒欣然慕之故雖起行伍間嚴厲不可犯  
至於仁心爲質者亦要其終而後見也

神道碑

初彰德旣亡又破永柵郡王怒其反覆驅老幼數萬欲  
屠之公曰此國家舊民吾兵力不能及爲所脅從果何  
罪耶王從公言釋不誅繼破濮州復欲屠之公言百姓  
未嘗敵我豈可與兵人併戮不若留農種以給芻秣濮  
人免者又數萬後於曹於定陶於楚邱於上黨蓋未有  
不然者大兵出武休出襄鄧公時在徐邳間以爲河南  
破屠戮必多乃載金繒往贖之且約諸將毋敢妄殺有



所擄獲必使之骨肉完保靈壁一縣當廢者五分人公  
悉救之兵人既素服公言重爲金幣所誘故皆全濟中  
有求還鄉里者悉縱遣之是冬大饑降人北渡者多饑  
死又藏亡法嚴犯者保社皆坐逋亡無所於託僵尸蔽  
野公命作糜粥盛置道傍人得恣食之所生者不知幾  
何人矣

神道碑

初公之部曲有亡歸益都者數十人益都破皆獲之人  
以爲必殺公一切不問王義深義斌之別將聞義斌敗  
將奔河南凡公族屬之在東平者皆爲所害河南破公



獲義深妻子厚爲賙恤之送還鄉里終不以舊事爲嫌  
其能人之所難能又如此

神道碑

東州旣爲樂土四外之人託公以爲命者相踵也公爲  
之合散亡業單貧舉喪葬助婚嫁多求而不靳屢至而  
不厭肉骨之賜蓋有不勝書者故聞公之訃遠近悲悼  
野哭巷祭旬月不能罷古所謂愛如父母敬如神明者

於公見之

神道碑

帝王之興天將舉全所覆者而畀之時則有魁偉宏傑  
之士爲之倡大義建大事一六合之同異定羣心之去



就初貞祐南渡豪傑乘亂而起四方之人無所歸命公據上流握勁兵威望之著隱若敵國人心之所以爲楚爲漢者皆倚之以爲重至是曉然知天命所在莫敢有異志國家亦藉之以成包舉之勢非天使之倡大義建大事以應興王之迹其能若是乎

神道碑

萬戶張忠武王

王名柔字德剛易州定興人金季累遷中都留守行元帥府事國兵至被執授河北東西等路都元帥金亡入覲乃遷萬戶將兵伐宋中統三年以年老乞致



仕封安肅公至元三年城大都起判行工部事進封  
蔡國公五年薨年七十九

公少倜儻不羈讀書畧通大義工騎射尚氣節喜游俠  
金貞祐間河朔擾攘土寇蜂起公聚族黨數千家壁西  
山東流渦選壯士團結隊伍以自衛遠近憚之莫敢犯  
以功授定興令累遷青州防禦使中都路經略使苗道  
潤表其材加昭勇大將軍遙領永定軍節度使權元帥  
右都監行元帥府事興定初道潤爲其副賈瑀所害瑀  
不自安遣使以好辭告公曰吾得除道潤以君正直不



以兵力黨惡人故也公怒叱使者還白瑀曰汝賊吾所

事不卽送死乃敢以此言相戲耶遂檄召道潤部曲會

易水之軍市川告以復仇之意衆因羅拜推公爲長者

事聞遷中京留守兼知大興府事時戊寅夏五月也公

年二十九

王文忠公撰神道碑

又陵川文集云初中

數騎出瑀伏甲射之顛于道左從者駭散有何伯祥者

獨下掖之道潤憊絕不能乘伏發前突伯祥奮槍大呼

殺數人賊乃遁去遂取道潤所佩金虎符以出令疾走

間道聞諸朝乃命靖安民代道潤伯祥因事之是歲安

定元年也明年靖公

卒伯祥以符節歸公  
方會兵討瑀而國朝大軍出紫荆關遂率所部戰于狼



牙嶺馬跌被執見主帥立而不跪左右強之公叱曰彼帥也吾亦帥也大丈夫死卽死終不偷生爲他人屈帥壯而釋之其散卒稍稍來集主帥恐公爲變質二親于燕公嘆曰吾受國厚恩不意猖獗至此顧忠孝不兩立姑爲二親屈遂委質焉未幾復舊職建旆而南下雄易安保諸州然猶不忘道潤之寃必欲誅瑀而瑀據孔山臺拒命自若遂攻之臺無井泉汲山下公先斷其汲道瑀乃降公縛瑀剖心以祭道潤時人義之

王文康公  
撰墓誌

戊寅冬徙治滿城城小而缺真定帥武仙會鎮定深冀



兵數萬來攻適全軍出帳下纔數百人公以老弱婦女  
乘城帥壯士突出敵後毀其攻具且策其師老而怠從  
數騎策馬挾槩大呼入圍敵皆披靡復使緣山張旗幟  
聲言救至曳柴揚塵鼓譟以進敵大潰追擊遺尸數十

里乘勝攻完州下之

州牧慷慨就戮公義而釋之陞爲守

祁陽曲陽等帥

皆來降遂圍中山先遣其將葛鐵槍來救戰于新樂飛

矢中公領落其二齒公拔矢以戰大破之斬首數千級

仙猶蓄憾遣藁城令劉成將兵來侵公戰獲成而復縱

之

墓誌



已卯秋八月南掠地至鼓城單騎入城諭以禍福鼓遂  
降進攻深澤寧晉諸縣皆下之由是深冀以北鎮定以  
東三十餘城莫不聽命緣山反側鹿兒和闕野貍狼山  
諸砦相繼望風納款公之威名震河朔矣墓誌

初公在鄉里聞賈瑀以軍三千掠其境當饋而起潛入  
行間伺其行及半奮踊大呼多所殺傷衆疑其有伏委  
仗而遁信安張甫亦嘗以數千人圍之時全軍悉出所  
留無幾公三分之更番接戰甫與公相聞而不識也因  
問張君安在公給應曰適出且還我曹卒隸耳甫懼乃



退保定王之昌阻水爲固他將莫敢近公冒險徑渡出

不意生擒之以歸其勇略類如此

溥南王公  
撰勲德碑

鄰境帥布薩彰格者素與公不相能旣而爲麾下所殺  
公聞之曰彼雖有過然長上也奈何擅殺之卒窮其主

名斬首以徇

神道  
碑

丁亥春以滿城地隘不能容衆乃移鎮于保保當南北  
之衝亂後荒空者十餘年公乃剡荆榛立市井通商販  
招流亡不數月官府第舍奐然一新向者井泉鹹鹵不  
可飲食遂引雞距一畝二泉鑿城門而入疏爲長河以



流穢濁樓觀相望陂池映帶若圖畫然遂爲燕南一大

都會

墓誌

初州之廟學在保塞故闔之北及公開府則夾兩闔闔  
囂然全闔殆非清廟居神之所遂於東南得爽塏地謀  
遷神居鳩工賦役殷廡一新講肄之舍庖藏之所以次  
具舉高廣其制幾于倍蓰又爲奎文樓於南鑿壁水于  
西歲戊午春告成遷神于廟釋奠以落之

陵川文集

壬辰天兵渡河明年汴降諸將爭取金繒公獨入史館  
收金寶錄祕府圖書仍訪求鄉曲耆舊望族十餘家若



高戶部李都運特立趙禮部三子贊克剛克慕楊翰子

恕堦賈庭揚護送北歸其薄汴梁蹙歸德陷汝南攻徐

邳公莫不身先士卒橫槊轉鬪大小數十戰未嘗敗衄

墓誌

又遺山元公撰勲德第二碑云汴城之役守者

屢出接戰我軍不能前公躍馬橫戈而出大呼諸帥卽

馳入陣中呼聲所及無不披靡汝南之役金兵軍南門

外決死戰宋兵瞻望不進公率士卒二十餘涉水入陣

莫有當其鋒者徐州之役攻久不下宋人出戰公率死

士五十人逆擊之敵退走明日急攻城隨陷論功第一

邳州之役諸軍築壘環其外城中危迫潰圍而出望見

公旗幟乃犯別帥軍公率兵救之又犯一軍公復救之

又犯一軍公復救之敵

竟敗而諸軍賴之以全

甲午入覲上勞之歷數戰勲曰某軍之勝汝之功也某



州之拔汝之功也如親見之乃論功行賞陞萬戶易金

虎符公于江淮遇戰輒穎脫深入斬將刈旗折馘執俘

而出

墓誌

又勲德碑云棗陽之役公奪外城據之城

中人啟南門出諸帥爲木柵禦之公繞出其後敵大潰曹武之役公出其不意度九里關宋兵竟出西山翼而下我軍方休爲所乘公率騎突圍而出遂屯曹武北長封嶺緣山保聚皆攻下之斬宋官兵十三人黃州之役州西有大湖與江通流公攻下之戰艦萬艘順流而下沿江接戰十日乃至城下宋水陸並逼我軍公攻之不戰而潰東門禦備甚堅公率死士奮戈而入守者請和乃班師滁州之役公率死士先登城遂拔

已亥詔公以本官節制河南路兵馬初乙未丙申間諸道所統仍金之舊保居燕趙之交分隸無幾辛丑特詔



還之升州爲府錫名順天別作一道賜御衣數襲尚廢  
馬百所乘大宛名馬二

墓誌

大河自汴已失隄障南放分流爲三杞爲中渾南接渦  
渙東連淮海浩瀚無際宋人恃地形之利駐亳泗犯汴  
洛以窺河南大帥察罕以公威名素爲敵人所畏奏公  
總諸軍鎮杞公乃相地形以殺水勢築爲連城分戍戰  
士結浮梁以通往來遠斥堠以防衝突津要旣固奸謀  
坐折瀕河居民始得安矣久之移鎮亳社亳去杞又五  
百里四面皆黃流非舟楫莫能至公至之日葺民居建



府第城壁悉斃以甃又爲橋梁以通歸德人民全集商

旅舟車往來如承平時宋人睨視不敢犯

墓誌

已未扈從渡江十一月奉旨總領蒙古漢軍城白鹿磯

遣將掠地千里南至潭州庚申二月還白江上

墓誌

公氣貌雄毅御軍嚴整號令所入將上凜然恩信素厚

賞罰分明旌旄所指士爭先死敵莫敢反顧故所向有

功

神道碑

公將南渡也語于衆曰吾戰爭二十年殺人多矣寧無

悔乎自今非對壘不復殺卒如其言遇他將俘四將被



戮者亦曲爲勸諭而活之降人親屬散落他所則百方購求必得而後已或求於我未嘗不與也

神道碑

軍興以來貧人或有所假貸勢家出予錢要利如羊生羔歲輒倍之往往賣田宅鬻妻子不能償公與真定史侯奏乞民用于錢至倍而止不得展轉滋息朝廷從之

神道碑

公性喜宴客每閒暇輒與士大夫談論終日不倦歲時

贍給或隨其器能任使之

神道碑

公嘗以家人數千口出爲齊民高陽公張甫元帥牛顯



雲皆嘗與公爲敵旣歿其妻子流離不能自存公皆厚  
加存恤其周急濟困之義皆毅然爲之墓誌

元帥張獻武王

王名宏範字仲疇萬戶忠武王第九子初代其兄攝  
順天府事中統三年授行軍總管從征李璫至元改  
元授順天路總管移守大名六年兵圍襄陽授益都  
行軍萬戶改亳州萬戶宋亡拜江東道宣慰使請還  
益衛兩王遂拜蒙古漢軍都元帥十六年冬嶺海平  
入覲十七年卒年四十三



王年二十餘其兄順天府總管宏略上計行朝留攝其  
府事吏民服其明決時內附甫定蒙古軍所過輒爲暴  
王曰國朝自有法制我奉行之執暴者決以杖入其境  
無敢犯者順天者古保州以忠武故陞府名後有所避  
又改今名曰保定云

蜀郡虞公  
撰廟堂碑

中統三年李璫叛濟南親王哈必齊丞相史天澤帥諸  
軍討之以王爲行軍總管且行請氈帳于忠武忠武曰  
汝欲卽安耶不與乃命之曰璫違天必敗汝勉之雖然  
璫劇賊也圍城勿避險地險則已無懈心兵必致死主



者慮其險苟有來犯必赴救可以立功汝必勉之及圍  
城王軍城西壇出軍突諸將獨不向王軍王曰吾固受  
教矣我易受攻而彼不至謂我勿備也乃築長壘內伏  
甲而外爲壕開東門以待夜浚其壕加廣壇不知也明  
日果擁飛橋來攻橋不足踰壕軍陷其得陵壕者突入  
壘門遇伏皆死降雨賊將壇讐遂敗死論功王最多忠  
武聞之曰真吾子也或言于朝曰壇所以得爲亂者盡  
專兵民之權故也以此聞諸侯諸侯果不自安遂罷其  
子弟之在官者王亦例解總管

廟堂碑



至元二年移守大名未上微服行民間察其所患苦見倉吏收民租視所當輸倍蓰怨言載道明日視事首取而治之民大悅是歲大水廬舍且盡租稅無從出王輒免之計相以專擅罪王請入見奏曰臣以爲朝廷儲小倉不若儲之大倉非擅免也上曰何說也王曰歲以水不收而必責之民府倉雖實而民死亡盡明年租將安出活其民使均足于家歲取有恒非陛下府庫乎此所謂大倉也上曰知體其勿問

廟堂碑

六年大括諸道兵益圍宋襄陽益都兵瑄所教也號勇



悍難制度諸帥無足統之者乃以王爲益都淄萊等路  
行軍萬戶丞相巴延命王軍鹿門斷糧道絕郢漢之援  
主者曰鹿門有張九漢水以東無慮矣于是王言于丞  
相曰今規取襄陽周于圍而緩于攻者計待其自斃乎  
然而夏貴乘江漲送衣糧入城我無禦之者而江陵歸  
峽行旅休卒道出襄陽南者相繼也寧有自斃之時乎  
若築萬山以斷其西立柵灌子灘以絕其東則庶幾斃  
之之道也奏用其言移王軍萬山令嚴恒無懈意二日  
出東門與諸將較射大出敵兵猝薄城諸將曰彼衆我



寡請嬰城自守王曰嘻我與諸君在此何事敵至將不戰耶敢言退者死卽披甲上馬橫戈立遣偏將李庭當其前他將將六百人攻其後親率二百騎爲長陣敵之步騎間陣而待王下令曰聞鼓皆進擊未鼓勿動敵麾衆入陣我不爲動至再且却王曰彼再進再却氣衰矣鼓之前後奮擊宋師大敗得奔還者無幾

廟堂碑

八年築一字城進逼襄陽破樊城外郭九年攻樊城流矢中王肘王束創見主帥曰襄在江南樊在江北我陸攻樊則襄出舟師來救終不可取若截江道斷救兵水



陸夾攻之則樊必破而襄亦下矣從之明日復出率銳卒先登遂拔樊襄陽降以宋將呂文煥入覲上嘉之有錦衣白金寶鞍之賜將校行賞有差

廟堂碑

十一年丞相巴延帥師伐宋命王率左部諸軍循漢江東畧郢而南十二月攻武磯堡取之天兵渡江王爲先驅宋相賈似道以其師軍蕪湖其帥孫虎臣軍丁家洲轉戰而前大兵繼之賈似道師潰王前行宣布威德所遇降下師次建康上遣使諭丞相毋輕敵貪進其少駐以待王進說曰聖恩待士卒誠厚今敵已奪氣亡在旦



夕過白遷緩資敵得爲計非策也將軍治閬外急緩之  
宜難制以渝度乘破竹之勢取之無遺策矣丞相然之  
卽日自馳驛至上前面論形勢得旨進師

廟堂碑

十三年師次瓜洲分兵立柵奪其要害守之揚州都統  
姜才者宋之名將也所統士有部落種人自爲一軍勁  
悍善戰至是以二萬人出揚子橋都元帥阿珠與王當  
之兩軍夾水而陣王以十三騎徑渡衝之陣堅不動王  
引卻以誘之其驍將本回紇人鎧仗甚異躍馬出衆奮  
大刀直前趨王王還轡反迎刺之應手頓殪馬下立陣



者同口驪叫震動天地而敵人亦不覺失聲遂潰走追  
殺轉至城南門斬首萬餘級其自相蹂踐與陷壕水溺  
死幾盡比得入城十無一矣王素善禦此戰衆尤服其  
奇焉于是宋將張世傑孫虎臣悉其國力率水軍陣于  
焦山南北將致死于我我師合擊之兵交王之一軍橫  
衝其旁宋師大敗宋自是不復能軍矣追奔于圖山之  
東王奪其戰艦八十俘馘以千數上功改亳州萬戶賜

名巴圖云

廟堂  
碑

是年冬丞相巴延次臨安之長安鎮中書左丞董公文



炳左出京口由海道會之王亦將兵在左師及宋郊丞相遣使約降宋主宋主幼其大臣難于削號稱臣請以伯姪爲禮往返未決王將命八城數其柄臣之罪而責之遂屈服竟取降表來上

廟堂碑

宋亡其主旣歸朝而十三年浙東又叛王力疾討之師次台州遣人持書往諭守將殺使焚書我師怒拔之衆請屠城王不許誅其首禍者而已台民至于今感之

廟堂碑

十四年拜江東宣慰使其民新脫鋒鏑王撫安之朞月



境內稱治

廟堂碑

十五年王入覲請于上曰宋主旣降而其將張世傑奉其庶兄益王昰與弟廣王昺南奔旣立昰于閩而卒又立昺于海上宜致討焉乃拜蒙古漢軍都元帥以行陛辭奏曰國朝之制無漢人典蒙古軍者臣漢人恐乖節度猝難成功願得親信蒙古大臣與俱上曰爾憶而父與察罕之事乎其破安邑也汝父欲留兵守之察罕不肯師旣南而城復爲宋有進退幾失據汝父至死不勝其悔恨也由委任不專今豈可使汝復有汝父之悔乎



尚能以汝父宣力國家之心爲心則予汝嘉今付汝大  
事勗之哉面賜錦衣玉帶又辭曰遺燭未息延命海濱  
奉詞進征無所事于衣帶也苟以甲劍爲賜則臣也得  
以仗國威靈率不聽命者則臣得其職矣上壯之出尚  
方劍名甲聽其自擇善者旣拜賜又諭之曰劍汝副也  
有不用命者以此處之且行薦李恒爲已貳從之至揚  
州選將校發水陸之師二萬分道南征以弟宏正爲先  
鋒戒之曰汝以驍勇見選非私汝也軍法重我不敢以  
私撓公汝慎之宏正所向克捷王進攻三江寨寨據隘



乘高不可近乃連兵環之寨中懼人持滿以待王下令  
下馬治朝食若將持久者持滿者疑不敢動而他寨不  
虞也忽磨軍連拔數寨廻擣三江盡拔之至漳州親攻  
其東門命將佐攻南門西門敵應之乃乘虛入其北門  
破之鮑浦寨南瀕海王曰陸攻之必走海令宏正圍以  
騎他將攻其南門又拔之海瀕之郡若潮若惠皆團結  
盤互王威聲所至恩信濟之無不內附

廟堂碑

十六年正月庚戌由潮陽港乘舟入海道至甲子門獲  
宋斥候將都統劉青顧愷乃知廣王所在辛丑至崖山



而他將自外省調至者雖隸所部然儕視不相下有驕蹇意幾故違其號令王以軍法斬其最惡者一人衆皆懾服聽命時宋人僑居海中環列千餘艘碇之建樓櫓其上隱然堅壁也王引舟師當之然其地兩山東西對立其地淺舟膠不可進我師由山之東轉而南入大洋始得與之薄又出騎兵斷其汲路燒其宮室而宋益困蹙無所容矣張世傑有甥韓在王軍中王使招世傑世傑不從甲戌恒自廣州至舟小更授以二海戰船守北面二月癸未我師將戰或請以砲攻之王曰火起則舟



散不如戰也明日四分其軍分處其東南北三面王自將一軍相去里許下令曰宋舟西艤崖山潮至必東遁急攻之勿令得去聞吾樂作乃戰違令者斬先麾北面一軍乘潮而戰不克李恒等順潮退樂作宋人以爲小宴且懈王舟犯其前南衆繼之王命高構戰樓于舟尾以布障之命軍士負盾而伏令之曰聞金聲起戰先金而妄動者死敵人傳我舟如蜩伏盾者不動舟將接鳴金撤障弧弩火石交作頃刻并破七舟宋師大潰宋臣以其主廣王赴水死獲其符璽印章張世傑北突吾軍



而遁令李恒追至大洋不及世傑走未至交趾風壞舟  
與將士俱溺死于是嶺海悉平宋無遺孽矣磨崖山之  
陽紀功而還廟堂碑又牧庵撰左丞李恒廟碑云宋  
是廣王昺浮海趣福立益王元以景炎閩廣諸州應者  
十五郡縣豪傑亦爭起兵公出定反地大破吳浚軍十  
萬南豐浚走如張文虎復合兵十萬又破之舉港伏尸  
三十里浚走合其相文天祥瑞金又大破之天祥走據  
汀別將孔遵窮追併破趙孟潛軍復其州而還天祥復  
陷汀收兵出興國又擊走之追四百里及之空坑散降  
其衆二十萬禽趙時賞以下文武將吏數百人益王殂  
廟號端宗世傑復立衛王改元祥興移柵海中崖山海  
道去廣治四百里公進復梅循惠潮與廣之諸道走王  
道夫擊凌震海上獲船三百艘禽將吏宋邁以下二百  
人又破其餘軍焚塘江淮省亦遣都元帥張宏範至自  
漳與共圍崖山勢計窮蹙度不能國資政陸秀夫抱衛



王蹈海死獲其金璽其將吏死焚溺者萬餘人翟國秀凌震皆降世傑遁去風壞舟死海陵港南海平

十月入朝賜宴內殿慰勞良厚然王以瘴癘疾作矣上命尚醫護視日以狀聞遣近侍臨議用藥曰吾有國事待其謀畫必盡技速愈之敕衛士坐其門口九巴圖病甚矣非必不可不見者宣詔止之可也疾革沐浴易衣冠俾左右扶至中庭面闕再拜遂入室酌酒作樂與親戚賓客爲別遺言毋厚葬出南征時賜劍與甲以畀嗣子珪曰汝父以是立功其佩服毋忘語竟端坐而薨

碑



王素敏悟喜讀書過目輒識大義歌詩尤慷慨身長七尺修髯如畫機明氣銳言辯捷出勇略絕人輕財下士拔材於衆已不以爲惠尚氣節敦信義與人交久而益敬剛直自持不爲勢位所屈雖臨之以威而辭氣洒落理辯愈明初丞相巴延至建康大命諸將出庫金行賞有後至者丞相曰祖宗之法凡以軍事命集罪加後雖貴近材勇無所貸爾何敢後衆錯愕王徐進曰臨戰未嘗後受賞恥居先何爲不可丞相爲之俛首其能片言解疑誤類如此簿錄宋內府金帛行省都事瓜爾佳之



奇與焉既而多所遺失或因以誣之奇將就考驗王曰  
之奇名士行又有素何可以此議之請以本身官爵及  
家帑保其必不然者其後誣果明南征時宋丞相文天  
祥之軍在潮之五坡嶺宏正掩擊獲之縛文丞相以至  
檣以戈使拜不屈王釋之待以客禮吏士或諫王曰敵  
人之相叵測不可近王曰忠義人也保無他求族屬被  
俘者悉還之及囚京師聞王薨至爲之垂涕又玉堂佳話云至元  
十二年臨安降度宗二庶子爲陳宜中張世傑擁入澈  
浦江口時有黑龍見因改號景炎爲帥臣張宏範破滅  
於崖山執文天祥至大都囚之欲赦出相之  
竟不從十九年十二月九日戮燕南城市中  
在海上海得



宋禮部侍郎鄧光薦禮之于家塾以爲子師嘗戒其子  
曰居官律已廉慎則公明自生御衆賞罰信明則人致  
力不懷報怨之心怨亦自釋此三言者皆王素躬行者  
也凡行軍非對敵未嘗妄殺吏卒有病者必爲親視醫  
藥不幸死必轉送其家凡上賜與卽頒士卒麾下有功  
賞或不時得則慨然曰人宣力如此而受抑如彼後或  
解體將誰與共功乎甚者爲之涕泣陳說不得請不止  
故人樂爲之用及爲元帥雖有所刑戮亦必爲之懇惻  
申諭仁聞旣著薨之日天下莫不傷悼痛惜焉

廟堂碑



元明名臣事略

卷下



臣  
倪思淳恭校



元朝名臣事略卷七

元 蘇 天 爵 撰

太保劉文正公

公名秉忠字仲晦順德邢臺人少隱武安山因祝髮  
從釋氏游後居雲中從海雲師應召北上留侍潛邸  
凡征伐謀議皆與焉至元初翰林王鶚請公改正衣  
冠詔從之遂拜太保參領中書省事十一年薨年五  
十九

公風骨秀異志氣英爽不羈家貧年十七爲邢臺節度



使府令史以養其親一日因案牘事有不愜意投筆嘆  
曰吾家奕世衣冠今乃汨沒爲刀筆吏乎卽棄去隱于  
武安山天寧禪師聞之遣其徒招致爲僧以公知書工  
翰墨命掌書記後遊雲中值海雲禪師被召北觀過雲  
中聞公博學多藝能求相見旣見約公俱行謁上于潛  
邸一見應對稱旨自是屢承顧問及征雲南還公遂見

留

王文忠公  
撰神道碑

錄事公卒訃音至公懇求奔喪上賜黃金百兩仍遣使  
送至邢州公持服營葬事服除被召後還和林公獻書



陳時事所宜者數十條率皆尊主庇民之事上嘉納之

神道碑

邢州古民郡也國初爲某官食邑州舊萬餘戶兵興以來不滿五七百公言于上曰今邢州破壞如此當得良二千石如真定張耕洛水劉肅者治之猶可完復如故上從之請于憲宗以耕爲邢州安撫使肅副之兩人皆儒者廉平方正旣至蘓枯弱強爬蠹剔荒由是流民四集宅爾宅田爾田未幾改邢州爲順德府

韋軒李公撰文集序

癸丑從征大理克城之日令行禁止未嘗妄戮一人公



之謀居多甲寅從征雲南己未從伐宋由陽邏渡濟漢  
江公曰古者軍賞不踰時蓋急武功作士氣也今三軍  
暴露于外久所至必捷而未獲少酬其勞可使近臣一

人慰藉之上曰善卽命呼嚕蘓以諭其志故人人踴躍

皆樂爲用進圍鄂州閱三月宋人乞和全師而還

文集序

丙辰上始建城市而修宮室乃命公相宅公以桓州東

灤水北之龍岡卜云其吉厥旣得卜則經營不三年而

畢務命曰開平尋升爲上都

文集序

上神武善斷每臨陣前無堅敵而中心仁愛公常贊之



以天地以好生爲德佛氏以慈悲濟物爲心方便救護  
所全活者不可勝計

神道碑

庚申上正位宸極命公曰凡治天下之大經養民之良  
法卿其議擬以奏公卽上採祖宗舊典參以古制之宜  
于今者條列以聞深稱上意詔下之日綱舉目張一時  
人材咸見錄用文物燦然一新

張忠宣公  
撰行狀

至元元年翰林承旨王鶚奏言書記秉忠効忠藩邸積  
有歲年參帷幄之密謀定社稷之大計忠勤勞績宜被  
褒崇今聖明御極萬物維新秉忠猶以野服散號守其



初心深所未安宜與正其衣冠崇以顯秩上覽奏即日  
會有司備禮冊授公光祿大夫位太保參領中書省事  
賜第于奉光坊給少府宮籍監戶甚衆公齋居蔬食終  
日澹然與平昔略不少異神道碑 又圖克坦公履撰墓誌銘云公既大拜以天下  
之重爲已任以身殉國知無不爲建國號定都邑頒章服立朝儀事無巨細有關於國家大體者條舉而縷陳之無有遺者又魯齋文集云初太保之奏朝儀也因言高帝有言吾乃今知皇帝之貴也上曰漢高眼孔小朕豈如是

十一年扈從至上都居南屏山精舍儼然端坐無疾而薨訃聞上嗟悼不已謂羣臣曰秉忠事朕三十餘年小



心慎密不避險艱事有可否言無隱情又其陰陽術數之精占事知來若合符契惟朕知之他人不能得與聞也

神道碑

公自幼好學至老不衰通曉音律精算數善推步仰觀占候六壬遁甲易經象數邵氏皇極之書靡不周知初丁太夫人憂毀瘠骨立衣一敝裘三歲不易及錄事公卒雖身從天竺之教而服食貶損容貌哀戚與循禮典而執通喪者無少異也

神道碑

國家列聖相承咸以武功戡定禍亂豐功偉績之臣不



爲不多若夫輔佐聖天子開文明之治立太平之基光  
守成之業者實惟公爲稱首上在潛邸士之所以涉遠  
道冒風霜而至者往往有所陳訴祈請惟公獨無所求  
燕閒之際每承顧問輒推薦南州人物可備器使者宜  
見錄用由是弓旌之招蒲輪所迓耆儒碩德奇才異能  
之士茅拔茹連至無虛月逮今三十年間敷歷朝省班  
布郡縣贊維新之化成治安之功者皆公平昔推薦之  
餘也

神道碑

丞相史忠武王



王名天澤大都永清人歲乙酉嗣其兄職爲都元帥  
已丑授真定大名河間濟南東平五路萬戶王子授  
河南經畧使中統元年授河南宣撫使盡兼江淮軍  
馬經畧使二年入拜中書右丞相至元三年皇子燕  
王領中書省兼判樞密遂拜中書左丞相兼樞密副  
使八年加開府儀同三司平章軍國重事十一年與  
丞相巴延總兵伐宋至郢以疾還十二年薨年七十

四

歲庚辰金將武仙以真定降太師國王命公兄天倪充



河北西路兵馬都元帥卽鎮守俾仙貳焉公時年二十餘身長八尺騎射拳勇絕人屬橐鞬署帳前總領

汲郡王公

撰家傳

乙酉春公護母北歸仙遽叛都帥遇害府僚王守道追公及燕曰變起倉猝部曲散在近郊卽迴旆當不招自至公毅然曰不共國之仇死亦當往況不死耶遂傾貲裝易鎧仗而南行次滿城得士馬甚衆遣監軍季伯佑言狀于王就請兵濟討卽命公紹兄職仍以國將實訥岱統精甲三千爲援合勢進攻盧奴仙驍將葛鐵槍擁



萬衆來援公撤圍逆之奮先將士灑血馳戰呼聲動地  
無不一當千葛氣褫會日暮退依沽水爲阻公料其退  
歸敵必宵遁果然乘之衆大潰生擒鐵槍軍威大振遂  
下中山略無極拔趙州進駐野頭仙懼奔西山之抱犢  
砦其年夏六月復真定無幾宋將彭義斌陰與仙合又  
圖竊取公同國將禦諸贊皇扼仙軍不得進義斌勢蹙  
燎山自固公令監軍孫某提銳卒五千略其後公以鐵  
騎蹂之斬義斌戲下自是義勇之名軒襍燕趙間後數  
月仙潛納反者匿大歷寺後斬關爲內應公跳走藁守



帥董俊以全軍授公復與實訥岱破走仙主帥忿其反  
覆驅萬人出將勦焉以示威公曰是皆吾民我力不能  
及一旦委去不幸爲賊脅制今殺之何罪乃全釋之公  
乃繕城壁儲武備爲不可犯之計歲荒食艱嘗甘茹苦  
與衆共之于是招流散拊瘡痍披荆榛掇瓦礫數年間  
官府民衆以次完治然商公抱犢諸柵仙之巢穴也不  
卽剪覆終遺後患隨攻下之仙鼠竄而去繼又取相衛

蟻尖蒼峪馬武京等砦

家傳

太宗卽位公入覲朝議方選三大元帥分統漢地兵



素聞公賢以杖麾公及劉哈瑪爾蕭某居右詔爲萬戶  
其居左者悉干夫長遂以真定河間大名東平濟南五  
諸侯兵隸焉

家傳

庚寅冬圍仙于汲金將完顏哈達以衆十萬來援兵始  
交不利諸將乘虛一時奔北公獨以千人繞出敵後挺  
刃橫擊敗一都尉軍旣而復與大軍合攻仙逸去復取

衛州

家傳

壬辰太宗由白溝渡河詔公以兵會河南至則睿宗已  
破哈達軍于三峰山命公略地京東遂招降太康懷縣



瓦岡睢州追殺帥臣完顏慶善努于陽邑

家傳

金主東播復自黃龍岡來襲我新衛公聞之輕騎馳赴比至已合圍奮戈突城下呼守者曰汝等勉力援兵繼來復躍出敵愕睨明日大軍至內外夾擊敗走蒲城公尾其後金將完顏布呼將兵尚八萬我軍殺掠殆盡金主以單舸東保歸德公與諸軍會睢陽薩奇蘇欲薄城背水而營公曰若敵來犯我進退失據此豈駐兵地耶公以事赴汴比還薩奇蘇全軍皆沒

家傳

金主入蔡諸道兵圍之公當其北面汝水阻其前乃結



筏潛渡血戰連日金遂亡

西溪王公  
撰行狀

金亡公還趙視師自乙未版籍後政煩賦重急于星火以民猝不能辦有司貸賈豎子錢代輸積累倍稱謂之羊羔利歲月稍積操籍來徵民至賣田鬻妻子有不能給者公詣闕奏其事言爲代償一本息而止軍則中戶充籍其征賦差貧富爲定額詔皆從之諸路永爲定制

家傳

戊戌己亥間仍歲蝗旱復假貸以足貢賦積銀至萬三千餘錠公度民不可重困乃先傾其家資次及族屬官



吏均配以償遂折其券

家傳

監郡孟克薩勒以國兵數萬散處州郡間伐桑蹂稼生意悴然公奏太后悉徙居嶺北于是田里有遂生之樂迄今真定兵甲民數勝于他郡由公牧養其根本故也

家傳

國朝自金亡歲有事于宋公未嘗不在戎行棗陽之役城小而堅主帥忿其攻久不服命徑乘其城公先登戰愈力克焉其攻襄陽也宋以舟師數千陳峭石灘犄角以綴我師公驅猛士兩舸直前擣之彼氣旣奪奮槳盪



決覆溺者萬計及取光化復引絙首上立陷其城復州  
之役敵以鬪艦三千艘鎖湖面爲柵破則復自續遂募  
勇敢士四十輩親鼓而前壞蕩無遺敵懼而降其攻壽  
春也宋人以我圍遠勢分緩急首尾莫應敵乘夜果來  
斫營公單騎逆戰手格殺數人戲下繼至盡驅敵人入  
淮水至若掀滁州蹂盱眙掇寶應瀕江渚湖旦破且降  
者二十餘所雖會諸道兵共事其伐謀制勝敵愾樹功  
未嘗不在羣帥之右及策勲盟府推讓行間寸長不掩  
故諸將曲盡其智能士卒樂出其死力論者謂公智信



仁勇有古良將風上在潛邸壬子春行幕駐嶺上極知  
漢地不治河南陝西尤甚憲宗方倚任於伊囉幹齊乃  
因朝覲請分河外所屬而試治之乞不令伊囉幹齊有  
所鈐制詔許之是時河南民無依恃差役急迫流離者  
多軍無紀律暴掠平民莫敢誰何邊無備禦宋人跳踉  
內地之民多被殺擄上舉公與趙公璧立經略司於汴  
而代治焉公於是選賢才居幕府以清其源置提領布  
郡縣以察奸弊均賦稅以蘇疲困更鈔法以通有無設  
行倉以給軍餉人始免攘奪矣立邊城以遏寇衝民皆



得以保全矣誅奸惡以肅官吏立屯田保甲以實邊鄙  
利則興之害則去之不一二年而河南大治行於野民  
安其樂郊出於途商免其露處觀民俗則旣庶而有教  
察軍志則又知夫怯私鬪而勇公戰威行惠布陽開陰  
肅內外修治略無遺策河流遠濶衛亦復承平之舊宋  
爲墮其北門矣

行狀

癸丑夏上在六盤召公議經略司事公因奏曰始臣攝  
先兄軍民之職先兄有二子民權已歸其長楫兵柄又  
歸其次權臣可退休矣上曰無夫之婦無父之子誰當



顧恤此卿之良德也問以退休之由公對曰臣一門三要職分所當辭上曰昔青吉斯皇帝封有功者十人爲千夫長因諭衆曰今所封之人有年幼者汝等無疑此人父兄俱有功於國未及封賞而死豈得不報又一家三子其一襲父職其次多才能固不以旣官一人而不用也又其次或立功效亦不以已官二人而不用也豈無一門三要職者竟不許辭

行狀

丁巳春詔左丞相阿勒達爾勾較諸路財賦阿勒達爾性苛刻鍛鍊羅織轉功爲罪例遭凌辱公以勲舊獨容



假之公曰經略事我實主之是非功罪理當我責今捨

焉而罪餘人心何能安用是得釋者甚衆

家傳

戊午秋扈憲宗西征明年夏駐合之釣魚山秋疫作方  
議回鑾宋將呂文德帥艤艫千餘蔽嘉陵江來犯逆戰  
不利上命公禦之乃分軍爲兩翼跨江注射親總舟師  
順流縱擊獲鉅艦數百艘追至重慶三戰三捷卒全師

而還

家傳

中統元年上卽位首詔公問以治國安民之術公具疏  
以聞大略以爲朝廷當先立省部以正紀綱設監司以



督諸路需恩澤以安反側退貪殘以任賢能班俸秩以養廉禁賄賂以防奸應能上下不應內外休息上嘉納之命公之鄂渚江上軍旣還詔授公河南宣撫使兼江

淮諸翼軍馬經略使

行狀

二年夏五月拜中書右丞相公旣秉鈞衡細大之務知無不爲然言必慮其所終事必稽其所蔽不强時之不能不禁民之必犯體時順勢通變制宜于是立中書以正紀綱分六部以綜名實設撫司以肅州郡退貪殘以簡賢能需恩澤以安反側頒祿秩以養廉節禁賄賂以



絕倖門又定省規十條董正其機務

家傳

憲宗初年括戶餘百萬至是諸色占役者強半悉奏罷之賦稅繭絲法盡均一論思之際處國相儒臣間調諧彌縫必使情通理得期于事集功成澤被生民而已自是上下交孚帝載熙緝中書無留務矣故中統初元文物休明階太平之治者公之力俱多

家傳

秋九月扈從北征次錫默圖與額埒布格遇上命錫津

將右軍公將左軍合大勢蹴之北兵潰遁

家傳

三年春李璫陰結宋人以益都叛率軍據濟南上命親



王哈必齊總諸道兵討之。瓊兇勢甚張，繼命公往。公受命不至，其家輕騎奔赴，至則亟築長圍，樹木柵遏其侵軼，使內外不相聞。凡四月，城中食盡，軍潰出降。生擒瓊，斬軍門誅同惡數十人，餘悉縱令歸家。明日，引軍吏行未至益都，城中人已開門迎降。初，公將行，上臨軒授詔，責公以專征之任，俾諸將皆聽節度。公自始至還，未嘗以詔旨示人，其謙退慎密如此。入見，上慰勞公，悉歸功諸將，若無一毫出於己者。

王文忠公撰神道碑

三齊平，公首奏兵民之權不可併居一門行之，請自臣



家始史氏子弟卽日皆解紱而退

家傳

至元三年皇太子燕王領中書省兼判樞密院以公爲左丞相樞密副使遂議建三衛及留兵寓農之策不二

三年國容軍實蔚然可觀

家傳

六年朝廷營取襄漢詔公與駙馬呼喇珠往經畫之至則相要害起一字城聯亘諸堡貯兵儲絕聲援示以久

駐必取之基明年以疾還

家傳

八年授開府儀同三司平章軍國重事仍令丞相安圖諭公曰中書省尙書省御史臺或一月或一旬遇有大



事卿可商量小事不必煩卿也

神道碑

十年宋將呂文煥以襄陽內附聖天子赫然有掃清六合混一車書之意明年春詔公與丞相巴延總大軍自襄陽水陸並進趣鄂渚渡江中道病不能進上聞遣使勞公仍慰諭曰卿自朕祖宗以來宣力者多矣又首事南伐異日功成皆卿力也勿以小疾阻行便爲憂勞可且北歸善自調護

又牧庵文集云公方將百萬之衆南伐至江而疾詔他將專制而還公于

軍其辭若曰畫剪宋策汝也成功而疾汝安可言誠有不諱碑汝之勲班汝之罰雖不可必死者之知能知之

者非人與汝子孫耶公還真定上又遣其子杜與尚醫馳視因附



奏曰臣大限有終死不足惜第願天兵渡江以殺掠爲

戒言訖而薨略不及其家事

家傳

公忠亮有大節出入將相近五十年其元勲碩德柱石  
四朝師表百辟殆古社稷臣而氣貌循然若無所爲者  
及臨大事論大政夷大難毅然以天下之重自任要以  
竭忠徇國尊主庇民爲心一以至誠將之其視富貴權  
勢斂然畏避若將有免于己者其善始令終世擬之郭  
汾陽而器量含宏識慮明哲又根于天性然

家傳

公孝敬友愛忠信誠篤明而恕寬而肅言約而理到氣



和而色莊人誣之而不辯人譽之而不喜勞而不伐有  
功而不德見利不苟就見害不苟避其行己也知時識  
勢其臨事也應變制宜

狀

公年四十始折節讀書酷嗜資治通鑑真積力久義精  
理貫至成敗是非往往立論出人意表雖老師宿儒有  
不加詳者至于矢論廟堂運籌帷幄良法美意契合融  
會見諸行事者誠無愧于古人

家傳

初武仙既害都元帥公紹其職及兄子楫長卽奏請以  
職歸之太宗曰但聞爭官者多讓職者少卿此舉殊可



嘉尙朕自有官界之卽詔楫爲真定路兵馬都總管又  
奏次姪權充唐鄧軍百戶憲宗駐六盤也詔發民爲兵  
敕使擬公子爲帥公曰吾兄弟三人大兄之子俱顯仲  
之子未也幸先之使者嗟狀行以仲子樞充新軍百戶

公嘗戒其子姪曰史氏起隴畝際風雲涼德薄效其將  
幾何今身名顯赫宗族昌熾如是何以答乾坤大造累  
朝之恩私乎若以王事歿身邊野裏馬革歸葬吾素願  
也汝等謹服此訓苟違吾言與暴吾邱墓等耳

家傳



初公之取衛也獲衛士富察輔之公問金朝才幹之人  
汝識者誰輔之以近侍局副使李正臣對及破歸德縛  
數人將殺之公問一縛者爲誰曰我李正臣也公救免  
遣人護送至真定後任爲參謀一路事悉聽其施爲措  
注焉每南征北覲公必署空名委劄數十通有可用者  
卽書畀之或讒間之公一不聽衛旣爲公食邑卽命軍  
前參議王昌齡治之衛前爲蕭帥所節制凡蕭氏所署  
矯虔之吏所行蠹政一切罷之失職者造爲誣毀公用  
之愈篤其知人之明用人之專類如此

狀行



北渡後名士多流寓失所知公好賢樂善偕來游依若  
王滹南元遺山李敬齋白樞密曹南湖劉房山段繼昌  
圖克坦侍講公爲料其生理賓禮甚厚暇則與之講究  
經史推明治道其張頤齋陳之綱楊西庵孫議事張條  
山擢用薦達至通顯云

家傳

憲宗駐合州也一夕詔鞏昌汪帥及東諸侯軍各摘銳  
士若干以備宿衛命公總之有邊將富察琚者偃蹇不  
爲下公含容之明年琚塔噶平行臺上其功獨琚名聞  
公問之或以前事對公曰苦戰功最多其可沒哉遂均



賞賚其忘過記功又如此

家傳

公初大拜朝野交慶公門閣蕭然有面說公不以威權自長者公因舉唐周墀爲相問于韋澳曰力小任重何以能濟澳曰願相公無權墀愕然不知所謂澳曰刑賞爵祿與天下共之何權之有言者悚服而退

家傳

自中統建元以來中書省官少卽五十員多至七十員列坐一堂凡政事議行之際所見異同互相軒輊待其國相可否之然後爲定公于其間審其無害則行之不疑若有失當心平氣和委曲論列期合于理而已不以



詭隨爲得計不以循默爲知體故在中書十餘年或奉行上意或更張事宜彌縫扶持天下陰受其賜者不可

勝計

行狀

嘗有上書奏先朝太宰請以汾陽王郭子儀濟陽王曹彬封諡之者上曰朕想郭子儀曹彬皆有顯功終身無大過以致如此今所奏豈其然哉朕所知者史天澤其人也

行狀

平章廉文正王

王名希憲字善甫輝和爾氏由父官廉訪使氏焉初



事潛邸歲癸丑授京兆宣撫使丁巳宣撫司罷中統  
元年復爲京兆宣撫使未幾拜中書右丞行秦蜀省  
事就拜平章政事四年召入朝拜中書平章政事至  
元二年分省山東踰月召還七年罷行十一年行省  
事北京明年行省江陵十四年以疾召還十七年薨  
年五十

公以辛卯五月二十五日生于燕適孝懿公廉訪使命  
下孝懿喜曰是兒必大吾門吾聞古者以官受氏天將  
以廉氏吾宗乎吾其從之舉族承命

河南高公  
撰家傳



公幼魁偉舉止異常九歲家四奴盜馬逸去已而俱歸  
失所盜物時法制未定盜咸當死孝懿怒將付有司公  
泣諫止之卒活此四人孝懿北上魏國夫人留居山中  
有豪奴兩人酗酒出惡言公曰是幼我也卽械繫府獄  
杖之家人悉震懾無敢譁者公仁義之施見諸幼年者  
已如此

家傳

年十九侍孝懿北覲入侍世祖潛藩上亦因其多智有

威容議論宏深恩顧殊絕

家傳

公於書嗜好尤篤雖食息之頃未嘗去手一日方讀孟



子聞急召因懷以進上問何書對曰孟子上問其說謂何公以性善義利之分愛牛之心擴而充之足以恩及四海爲對上善其說目爲廉孟子

家傳

諸貴臣校射上前一貴臣顧公取三矢似欲授公公曰爾豈億我爲不能耶顧吾力弓差軟諸貴假以勁弓三發連中諸貴驚服曰真文武全才有用書生

家傳

上初以京兆分地置宣撫司歲甲寅還自雲南卽命公爲宣撫使京兆諸郡臂指隴蜀諸王貴藩環擁周布戶雜羌戎尤號難治公訪民瘼不憚設施摧摘奸強扶植



貧弱事無遺便少暇則延訪耆宿如魯齋許公雪齋姚公咸待以師友薦許公於潛邸充京兆提學俾教育人材爲根本計辟河南智仲可參幕府扁所居堂曰止善公退則坐於中明經讀史凡義理精粗事務得失研究纖密必歸於是而後已

家傳

富民貸錢民間至本息相當責入其本又以其息爲券歲月責償號羊羔利其徵取之暴如夏以火迫冬置凌室民不勝其毒公正其罪雖歲月踰久毋過本息對償餘皆取券焚之後著之令

家傳



國朝創制凡名爲士類者毋隸奴籍獨京兆多豪右廢格不行公至一如令有稍通章句者亦來徼倖其主蓄憾勿置公哀其情出私錢贖之俾附儒籍

家傳

民有其妻與卜者厭詛其夫置毒殺之獄成僚佐皆言

方大旱宜減死卜者公並署伏法澍雨隨應

家傳

歲丁巳憲宗以世祖嘗受命經理河南關右入讒者言

謂王府諸臣多壇權爲奸利事命其貴強相阿勒達爾以丞相行省事劉太平以參知政事佐之鉤校括索不遺餘力又取諸路酷吏分領其事復大開告訐虐焰恟



恂公言關中宣撫一司某當身任佐屬受成事而已事  
竟卒無毫髮得自是河南關右諸司詔並停寢公還王

府凡府屬漢人之在行者悉命公領之如古納言

家傳

歲己未憲宗方駐蹕合州而世祖已經渡大江取鄂城  
克之日命公入籍府庫公引儒生百餘拜伏軍門因言  
今王師一舉渡江宜令軍中應俘獲南儒並以官錢遣

還家以廣異恩上嘉納之所還者五百餘人

家傳

憲宗訃至且聞河朔摘軍之擾敕諸軍守鄂公從世祖  
北還因陳大計曰殿下太祖嫡孫先皇母弟前征雲南



刻期撫定暨今南伐率先取鄂天道可知且殿下收召  
賢傑悉洽人望子育黎庶率土歸心今先皇奄棄萬國  
神器無主而殿下位親望重功德兼隆天意人心灼然  
可見上頗然之且命公前行審察事變公聞劉太平暨  
先朝大將和囉輝復至關右又念先帝經蜀嘗留大將  
琿塔噶以騎兵四萬屯守六盤及征南諸將尚散處秦  
蜀太平自先朝用事與諸將要結素習險詐又畏主上  
英果因關右形便扇搖民心驚動汾晉河南誠非細故  
及上旣渡河悉以聞奏遣趙良弼西行假以他故偵伺



事情深然之

家傳

憲宗南征留季弟額埒布格居守北庭及訃聞遣其用  
事臣托果斯徵兵河朔大肆凶暴真定名士李槃嘗以  
莊聖太后命侍額埒布格講讀及托果斯至真定怒槃  
不附已械繫之獄燕南諸路震駭無所控語公間訪槃  
繫于獄言于上釋之民情大悅

家傳

上欲賜塔齊爾王飲膳難其人公請行旣至王甚歡語  
及上渡江事公曰主上聖德神功天順人歸高出前古  
臣下論議已定大王位屬爲尊若至開平首當推戴無



爲他人所先王大然之許以身任其事公還奏其言上  
曰如此大事卿輒言之何不畏慎耶對曰臣所讀書云  
時然後言臣語言之頃得其誠心故言

家傳

歲庚申春上在開平諸王宗室相繼勸進上謙讓未許  
公以天時人事進言曰今額埒布格雖殿下母弟彼以  
前嘗居守專制有年設有奸人俾正位號以璽書見徵  
我爲後時今若早承大統頒告德音彼雖遷延宿留便  
名叛逆安危逆順間不容髮宜早定大計上良久曰汝  
等能叶心輔翼吾意已決促篆寶文一冶而成衆皆稱



賀翌日上登寶位

家傳

時鄂兵未遠公奏言宋嘗壓以天威彼已破膽或遣信使諭以息兵請好敕諸軍北歸則恩威並著上善其言

乃遣使如宋

家傳

趙良弼還自關右奏言劉太平和囉輝已行尚書省獨收關中諸處錢穀名為應接川蜀實欲據有其地與六盤相為表裏其勢張甚又西川大帥耨埒一軍私屬與六盤密邇其副將奇塔特布哈親戚軍屬並在北庭其心皆不可測又聞額埒布格已分遣心腹易置諸將又



散金帛分賚將吏大抵皆如公言上既卽位以秦蜀地重非公莫可及分十道宣撫乃以關右四川併爲一道首命公爲宣撫使公受命馳赴太平和囉輝聞之以五月一日乘急傳入城中密謀爲變秦人前被阿勒達爾太平等威虐聞其來皆膽落初三日公亦入城大集官吏宣示詔旨遣人馳往六盤宣諭安撫時事新集人素懷公不數日官府初定頗知趣向後旬餘城門候引一急使至云我來自六盤斷事官庫庫楚遣我今琿塔噶已反公所遣使已殺又分遣人乘急傳入成都密拉和



卓青居奇塔特布哈各起軍馬來赴援又多遣蒙古軍  
鄂囉官烏努呼等金帛使盛起新軍且約太平和囉輝  
同時舉事公集僚佐議曰聖上首命我輩正爲今日事  
疑變生脫致罪釁我當身任不以相及乃分遣萬戶劉  
哈瑪爾京兆治中高鵬霄華州尹史廣掩捕太平和囉  
輝等具得逆黨與六盤要結狀又遣哈瑪爾誅密拉和  
卓于成都總帥汪惟正誅奇塔特布哈于青居時關中  
無兵備公嘗厚遇總帥汪惟良知其才可用又以汪府  
兵精併徵秦鞏平涼等處諸軍俾將之進討汪帥危疑



未卽聽命公取金虎符銀印授之曰此皆身承密旨君第辦吾事制符已馳奏矣又付銀萬五千兩以充犒賞又出庫幣爲軍衣汪大感激遂行公又摘蜀卒踐更及在家餘丁復得四千人推蒙古官巴崇將之逆擊謂巴崇曰君所將烏合六盤兵精毋與爭鋒但張吾軍聲使不得東則大事濟矣

家傳

公繫太平等于獄一日急報赦至臨潼公曰勅寇在邇太平等豈赦所原乃遣人逆止近郊絞太平等于獄尸諸通衢方出迎赦民心帖然公遣使自劾停閣赦恩徵



調諸軍擅帥惟良等罪上深善之曰此卿輩讀書所說  
權字是也朕委卿以方面之權事當從宜無拘常制坐  
失事機

家傳

巴崇遣其子執送耨埒軍鄂囉官二人曰此曹已受琿  
塔噶重賞欲舉軍應募同行五十餘人已械繫乾州宜  
並誅戮以警餘軍兩人者自分必死公謂佐屬曰琿塔  
噶不能乘勢以東保無他慮今雖民心粗定衆心未一  
反側不安亂何由息彼皆諸軍將校彼軍見其執囚或  
別生心爲害不細今因其懼死並皆寬釋使恩出非望



必思効力就發此軍餘丁往隸巴崇兩人者旣得釋果大喜過望切論其屬使出兵効力初巴崇旣囚執諸校北軍疑懼駭亂四出莫可禁遏及使至知諸校安全且聞兩人語人人感悅巴崇亦釋然開悟果得精騎數千將與俱西公復謂巴崇曰聞君欲深入追襲慎無輕鬪宜緩行追躡掎角此寇琿塔噶亦知公有備且據有六盤倉庫遂西渡河徑趣甘州阿勒達爾復自和林提兵與琿塔噶軍合又遣奸人約結隴蜀將又使耨埒兄薩敦者爲書招耨埒于是成都帥百嘉努興元帥蒙古岱



青居帥汪惟正奇徹等俱遣使來言人心疑危倉糧不  
繼恐南寇生心事或莫測公遣使申救將吏曰公等皆  
勲業世胄政宜協心畢力無替先烈一旦以觀望召釁  
悔將何及兩川將帥素憚公威名佩服忠藎咸思輯睦  
軍政帖然上卽拜公中書右丞行秦蜀省事

家傳

時朝議欲捐兩川退守興元公聞謂佐屬曰今四川已  
安糧餉已給忽出此議必遺後悔卽遣使論奏朝廷是  
之

家傳

初瑋塔噶阿勒達爾旣合兵而東我前軍失利河南大



震西土親王哲伯特穆爾棄輜重皆就食秦雍會親王  
哈坦及汪帥巴崇等軍合復與瑋塔噶阿勒達爾大戰  
西涼我師大捷俘斬西軍畧盡得三叛首以送梟之京  
兆市三日諸軍還悉分屯便近所至足餉而居者不擾  
事聞上大嘉之曰此真男子事遂進拜平章政事公時  
年三十矣

家傳

公奏四川降民皆散處山谷宜申敕軍吏無妄擄掠違  
者自本軍千戶以下與犯人同科又禁諸人無販易生  
口由是四川遂安降民益衆又罷解鹽戶所摘軍及京



兆諸處無籍戶戍靈州屯田者以裕民力

家傳

東川帥奇徹獲宋知資州張炳震與戎司統制王政兩  
人俱言母老咸願矜貸公乃遣還就爲書遣四川帥余  
玠大畧諭聖天子威德必能混一六合兼強弱異勢較  
如白黑彼方權臣用事猜忌勲舊終當瓦解玠得書感  
愧雖未卽降自是亦謹疆界帖然自守而已

家傳

鞏昌帥府言鎮戎州有謀爲不軌者反形已具連引數

百餘人公詳推之得首惡五人誅之餘並原釋

家傳

詔大會諸王公馳驛入朝上已留公參政商挺馳使奏



曰向時瑋塔噶之亂若非廉相關中安危未可知兼關  
中軍民他人難制惟廉相能得其心聞朝廷欲留人心  
驚疑皆不自安今關中最爲重地關中安則河南河北  
俱安所係利害不小乞早命公還鎮上不得已還公西

省

家傳

瀘州降將劉整囚我叛人數百軍吏請誅以戒王曰力  
屈而降豈其心哉奏而免之導整入覲手書宰臣使整  
有所覲感恩浹其心當得死力

清河元公  
撰神道碑

詔括京兆諸郡馬牛以濟河西王奏曰關中兵亂凋瘵



己極歲賦不充尚堪此役奏入特復二年馬牛免括其

年自春涉夏大旱王步禱終南其夕大雨

神道碑

時以額埒布格之變北事未寧恒有旨諭公與汪帥宜  
申敕將吏嚴整部伍及一切器備所摘新軍毋或散遣  
所部城池宜令深峻先是宋俘費寅以利口才捷仕國  
朝爲同知興元府事後坐法當死會赦出之公悉其人  
不用寅懷憾以北適李璫反山東寅乘間讒公聚兵完  
城當有他志上命中書右丞諾海代公行省且覆視所  
告事無一得詔公還朝公陛見言曰臣在京兆三年值



邊叛四起川隴未寧民心危疑事急星火臣隨宣所屬  
佐貳母或柅止如寅所言罪止在臣請逮繫有司上撫  
御座曰當時之言天知之朕知之卿果何罪慰諭良久

拜中書平章政事

家傳

方逆璫未誅平章趙璧素忌公勲名倡言王文統一窮  
措大由廉某張易薦遂至大用今日豈得不坐一日夜  
半中使召公入從容道潛邸事良久及趙言公曰向行  
蹕駐鄂賈似道以木柵環城一夕而辨聖諭謂扈從諸  
臣曰吾安得如似道者用之秉忠易進言山東有王文



統才智士也今爲李璫幕僚詔問臣臣對亦聞之其心

固未識也上曰然朕亦記此

家傳

公在中書毅然以振舉綱紀脗削冗類裁抑僥倖考覈名實爲務凡前政踵習故弊者毋弛不張故當時翕然致理文物典章粲然可考

家傳

公言國家自開創以來凡納土及始命之臣咸令出守逮今垂六十年故其子若孫並奴視所部而郡邑長吏皆其阜隸僮使此皆古所無之宜從更張俾考課黜陟始議行遷轉法五品以上制授六品以下敕授

家傳



丁太夫人憂公率族親行古喪禮勺飲不入口者三日  
慟輒嘔血扶乃能起既葬苦塊廬墓所諸相以居憂無  
例欲極力起公相與詣廬聞公號痛竟不忍言數月制

奪哀起復

家傳

至元二年分考山東黜陟官吏省併郡佐登能進賢擢  
忠扶弱物無遁情山東諸使皆震懾失次公徐諭以祖  
先創業之艱汝曹宜一力與國作成新政庶幾保有基  
緒取其尤不法者數人繫之舊以縣名戶不及者立約  
裁省轉易之地遠不踰五百里不兩月訖事召還

家傳



公以舉選未立權令各路歲薦經明行修及長于吏治

者各一人以備選擇

家傳

有中貴傳旨朝堂某事當爾諸相欲從之公曰此小臣

預政漸也事宜覆奏上是公言杖其人

家傳

時阿哈瑪特寵眷日隆已領左右部其黨自相攻擊上

命都省推覆衆畏其權莫敢問公獨窮治其事阿哈瑪

特竟得決杖遂罷所領還復有司

家傳

上諭王曰吏弛法而貪民廢業而逃工不給用財不贍  
費先朝嘗以戚矣自相卿等朕無此戚王對曰陛下聖



猶堯舜臣等未能以臯契之道贊輔治化而致雍熙慚  
對天顏今日小康未足多也上因論及魏徵王曰忠臣  
良臣何代無之顧人主用與不用耳

神道碑

言者訟史丞相子姪布列中外威權太盛久將難制詔  
王罷丞相政事待鞫王奏曰知天澤深者陛下也粵自  
潛藩多經任使將兵牧民悉著治效以其可屬大任因  
使處茲相位小人一旦有言陛下察其心跡果有跋扈  
不臣者乎今日信臣故臣得預此旨他日一人訟臣臣  
亦入疑矣臣等承乏政府上之疑信若是何敢自保天



澤旣罷亦當罷臣上曰卿姑去明日召王曰昨思之天

澤無對訟者

神道碑

有訟西川帥奇徹罪者上敕中書急發使誅之明日王  
覆奏上怒曰尚爾遲回對曰奇徹大帥以一人之言被  
誅西川必駭遽之至此與論者庭對暴其罪于天下可  
也上曰其遣能者按問旣而卒無一實奇徹得免

神道碑

王奏議上前讜論具陳無少回借上曰汝昔事朕王邸  
猶或容受爲天子臣乃爾木強耶王對曰王府事輕爲  
天子論天下事一或面從天下將受其害非自不愛也



神道碑

方士請鍊大丹敕中書給其所需王奏曰前世人主多爲方士誑惑堯舜得壽不假于大丹也上曰然卻之

神道碑

碑

上公命受戒國師公對曰臣已受孔子戒上曰汝孔子亦有戒耶對曰爲臣當忠爲子當孝孔門之戒如是而

已

家傳

始建御史臺外設諸道提刑按察使時阿哈瑪特專總財利迺日庶務責成各路錢穀付之轉運必繩治者此



胡能辦事公曰今立臺察不獨事遵古制蓋內則彈劾  
姦邪外則察視非常訪求民瘼裨益國政無大此者如  
君所言必使上下專恣貪暴公行然後事可集耶權臣

語塞

家傳

回鶻官聽智密鼎者用事先朝爲怨家所訴繫獄未幾  
詔釋大都見禁囚詔至公適在告堂判無公署至秋車  
駕還都怨家復訴上怒詔畱守諸相詰之公令取堂判  
補署之曰倘天威莫測豈可幸無已署獨免也公進以  
前詔爲言上曰詔釋囚併釋聽智密鼎豈亦有詔耶公



對曰不釋此囚臣亦未聞有詔上愈怒曰汝等號稱讀書此宜何罪公曰臣等備員宰相有罪當罷退上曰第從汝言卽與左丞相耶律鑄並罷政事實至元七年也當權奸柄用公家居教子讀書而憂國之心食息不忘聞一令之苛戚見顏間或一事裕民喜至忘寐一日公嘆曰陽豈可無陰亦無絕理也聖人進君子折小人盡

人道爾

家傳

上嘗問希憲居家何爲左右以讀書對上曰讀書固朕所教讀之不肯見用何多讀爲阿哈瑪特讒曰日與妻



孥燕樂爾上色變曰希憲清貧何從燕設

神道碑

王疾大作上遣醫三人診視或言須砂糖作飲食時最艱得王弟某求諸阿哈瑪特與之二斤且致密意王推著在地曰使此物果能活人吾終不以奸人所遺愈疾

也上聞特賜三斤

神道碑

先是以嗣國王特訥克行省鎮遼霽東人有言其不便者十一年奏王病稍愈上命公往將行肩輿入辭賜坐上曰昔我先朝卿先事知幾每啟朕以帝道及鄂渚班師屢述天命朕心不忘丞相卿實宜爲顧自退託爾遼



霽戶不數萬正以諸王國壻分地所在居者行者聯絡  
旁午明者見往知來察微燭著塔齊爾諸王素知卿能  
命卿往者識朕此意

神道碑

王至北京問民所苦皆曰有西域人自稱駙馬營于城  
外繫富家誣其祖父嘗貸子錢執之使償無所于訴旦  
日持牒告王王卽遣吏逮駙馬者其人怒乘馬而來直  
入省堂徑坐榻上王令曳下跪而詰之曰制無私獄汝  
何人敢爾繫民其械繫之哀禱請命國王亦爲之言稍  
寬之使待對一夕拔營遁去

神道碑



達勒達使者傳旨國王立聽王坐自如曰大臣無爲王起者使者還語其王王曰彼朝廷大臣無違禮也詔國

王歸國王獨行省事

神道碑

朝廷發寶鈔市馬六千五百王遣市東州盡所發鈔得羨馬千三百王曰上之則類自銜其以馬依元直予他郡他郡馬不入慮害及其民終不忍分彼此也

神道碑

長公主及國婿入朝縱獵郊原發民牛車載其所獲徵求須索其費至鈔萬五千貫王燕公主從者怨食不及王曰我天子宰相非汝庖者國婿怒起王隨之曰主婿



縱獵原禽非國務也費民財不貲我且馳奏矣國媚愕然入語公主公主出飲王酒曰從者煩民我不知也請出鈔如數償民幸公止使者自後貴人過者皆不敢縱王師渡江急召王朝會右丞阿爾哈雅下江陵圖其地形上之請曰荊州西距梁益南控交廣據江淮上游誠爲要地非朝廷重臣開大府以鎮之未足以綏新附徠遠人上夜召王賜坐曰荆南入我版籍使新附者感恩忘苦未來者懷化効順未知我朝有臣如此亦足降其心也南土濕下於卿疾非宜今以大事託卿卿當不辭



賜卿田以其入食留者馬五十匹以給從者王對曰臣  
每懼識度淺薄不能仰荷重寄何敢辭疾力請不受新  
賜詔荆湖行省承制官三品以下刻印板授奏入制出

神道  
碑

公冒暑兼程以進既至阿爾哈雅率其屬郊迎比公止  
車已望拜塵中南人大駭先是政無綱紀士卒縱橫剽  
奪商販城門晝閉燈火禁嚴民心驚疑生意蕭索公卽  
日開諭令各軍歸營騎兵徙屯高敞以便牧養非調發  
請給不得輒出闢城四門毋得拘檢弛燈火之禁內外



帖然民始安枕

家傳

歸附之初故官咸懷驚疑陰有去志公下車議錄用宣撫制置兩司幕僚以備採訪左右難之公曰今天下一家皆大元臣子也君等勿疑擇可與論議者二十餘員訪逮物情隨材錄用人心感激懷服威惠不數月政化

大行

家傳

時宋故官禮謁大府必以珍玩重器動至數牀公至亦來謁見公曰汝等身仍故官或不次陞擢當念聖恩報効朝廷使此物盡諸公已財我取非義一或係官事同



盜竊若取於人不爲無罪慎勿爲此以蠹政害民公一  
無所受各官感激謝去

家傳

有言南人立券鬻妻子者公聞蹙然曰人倫之壞一至  
此迺嚴爲條禁當相買賣者並坐沒入所直且卽罪有  
司立禁絕公號令一行賞罰必信凡下條約所在奉行  
惟謹而不敢犯

家傳

公暇日登城顧見城闌之外瀦水彌望公曰此宋扞敵  
下策當還之江流遂得陸地數百萬畝招諭富民隨力  
耕種約以三年後減半收租貧民趨之曾未期年已成



沃壤

家傳

初江陵沙市後降其倉儲不入官籍恣豪右私取公聞之曰此皆民力豈可徒資貪鄙迺令槩闕得米二十萬斛會公安民闕食公發廩賑賚全活益衆

家傳

王顧民粗安乃曰風教不可後也遂大興學旦日親蒞校官講授以倡他郡撤官屋以復竹林書院與書萬四

千卷學者日盛

神道碑

王政化大行聲及四遠思播田楊二氏負固不下重慶趙定應堅守恥降皆遣使納款王謂二使曰歸語而主



速歸所隸以全民命我已馳奏天子詔安爾土矣奏上  
上曰國家不用兵得地未之見也希憲坐致數千里之  
堅城勁士其仁政爲何如也寶慶武岡益陽安化善化  
寧鄉諸城籍編民冑圍納款王移文其省使安全之神道碑

鎮遠溪洞蠻酋以其樂工四十餘人重譯來至曰願奏  
土風於天子之庭王曰而輩獨無妻子乎驅迫而來豈  
其心哉且天子仁聖不重夷音皆泣拜而回神道碑

關譏得江陵人私書不敢發封樞密臣發之上前其語



曰歸附之初人無生意大元皇帝命廉相出鎮荆湖豈  
惟人漸德化草木昆蟲咸被澤矣上嘆曰希憲不嗜殺  
人故能致此

神道碑

王或疾士民羣走僧寺道館爲王祈福語及必額手叩  
齒祝曰願我公永長我人

神道碑

王疾日劇上聞卽命尚醫馳視十四年春僉樞密院事  
董文忠奏曰江陵熱濕奈希憲沈疴何上卽召還荆南  
人聞王且去皆號泣隨之擁所乘車不得行王慰諭再  
四乃拜哭而别大者繪像建祠小者書版瞻禮王囊橐



蕭然琴書目隨

神道碑

五月公至上都館華嚴寺時太常卿田忠良領陰陽事  
一日來問疾公曰上都聖上龍飛之地天下視爲根本  
近岡遺火此居民常事今南人萃此勿令妄談風水惑  
動上意未幾副樞張公易左丞張公文謙果與南人數  
輩廷辯徙置都邑二相力言不可上不懌而罷明日召  
太常質前所言忠良以公言對上曰希憲方大病念及  
此耶其議遂寢

家傳

詔徵明醫王仲明于揚州未見行意士大夫責之曰君



術固妙其能已億兆人之疾乎蒼生懸望廉公復相久矣能起廉公是惠及天下也仲明乃至進其良劑能杖而起上喜召入聞卿比得良醫曰俟痊復王對曰醫持善藥治臣沈疾苟能戒謹誠如聖諭稍或肆情終將不療蓋以醫諫也

神道碑

會議立門下省上曰首官何稱曰侍中曰侍中非希憲不可遣近臣諭旨曰鞍馬之任不以勞卿乘軒論道時至治所必須執奏肩輿以入王附奏曰臣疾何恤輸忠効力生平深願時皇太子方聽政遣人諭王曰上命領



門下省勿難羣小吾爲公除之阿哈瑪特不利而止神道碑

安西王相商挺以博古名世嘗語公宜蓄古器物以廣見聞公曰古玩無古于易與書者他尚何求家傳

時營繕東宮工部官請曰牡丹名品惟相公家乞移植數本太子知出公家矣王曰若出特命園雖先業一無所靳我早事聖主備位宰相未當曲丐恩幸方爾病退顧以花求媚耶請者愧止神道碑

十六年春詔復入中書王稱疾篤皇太子遣侍臣問疾



因叩治道王曰君天下者二道用君子則治用小人則臣亂病雖劇委之于天所甚憂者大奸專柄羣邪蠹附誤國害民之大者殿下宜開聖意急爲屏除不然日以沈痼不可藥矣語聞深嘉重之

神道碑

王嘗戒子恂恪曰丈夫見義勇爲禍福安可逆必又曰宰相須有力量未有無力量能爲賢相者天下事苟無牽制三代可復也又曰稷契皋夔伊傅周召使爲不及是自棄也又曰汝讀狄梁公傳否梁公有大節乃爲不肖子所墜汝輩當深以爲警

神道碑



公秉政中書凡六年當是時也朝廷清明海內乂安臺  
察百官日漸張舉家無滯事野無遺才權臣韜奸羣小  
斂畏故公常言君子小人勢猶水火必欲兼收並用以  
致堯舜之理者前未聞也及公去位奸臣滔天羣小附  
起天下靡然風俗大變彼雖外爲狐媚求好而投間抵  
巇以相毒螫無所不至而公卒以直言正道至終其身  
不變家傳

十七年十一月十九日夜大星隕于正寢之後樂堂流  
光燭地久之方滅是夕王薨士大夫走哭相弔天下知



之者無不嗟傷咸曰良相逝矣蒼生何望上每追思之

曰當諸王大會議決大事惟廉希憲能也

神道碑

丞相淮安忠武王曰廉公宰相中真宰相男子中真男

子可謂名言

神道碑

左丞張忠宣公

公名文謙字仲謙順德沙河人歲丁未召居潛邸中

統元年拜中書左丞行大名宣撫司事至元改元行

省事于中興七年拜大司農卿十三年拜御史中丞

明年拜昭文館大學士領太史院事十九年拜樞密



副使是歲薨年六十七

公幼聰敏讀書善記誦自入小學與太保劉公同研席  
年相若志相得其後太保祝髮爲僧侍世祖于潛邸薦  
公才可用歲丁未驛召北上入見召對稱旨擢置侍從

之列命司王府教令牋奏日見信任

野齊李公撰神道碑又某公撰先

塋碑云公少時欲習簿書之事軍副府君召而責之公  
謝曰身漸長大無所効用仰衣食于父母心日不安故  
勉強爲此今蒙尊誨敢不敬從卽捨誦讀之習專志儒  
學戊戌歲朝廷命試天下儒士公試文名中選得免本  
戶徭役之差

邢初分隸勲臣二千戶爲食邑歲遣人更迭監收類皆



不知撫治加之頻歲軍興郡當驛傳衝要徵求需索民不堪命會郡人赴愬王府公與太保實爲先容合辭言于世祖曰今民生困弊莫邢爲甚掾焚拯溺宜不可後盍擇人往治要其成效俾四方諸侯取法于我則天下均受賜矣世祖從之命近臣托克托故劉尚書肅李侍郎簡偕往三人者同心爲治黜去貪暴剷除宿弊不朞月流亡者復益十倍于是世祖益重儒士任之以政蓋

自公發之

神道碑

辛亥憲宗踐祚世祖以太弟日侍宸扆所言率賜俞允



公暨太保數條具時務所當先者爲世祖言皆奏可施行之是後大駕所臨若大理若漢鄂公皆扈行

神道碑

世祖卽位首拜中書左丞與平章王文統共政建立綱紀講明利病以安國便民爲務詔令一出天下有太平之望文統素忌公謀議之際屢相可否積不能平公遽求出詔以本職行大名等路宣撫司事且有後命曰第往行召卿矣比行謂文統言天下生民罷瘵日久歲屬大旱若不量蠲稅賦將無以慰來蘇之望文統以爲上新卽位國家經費不貲且素無積儲何所供億公曰百



姓足君孰與不足俟時和歲豐取之未晚也竟蠲常賦  
什之四商酒稅額什之二下車宣布德意百姓歡欣鼓  
舞思見德化之盛

神道碑

二年春入朝還居政府始立左右郎分司綜務鉅細畢

舉公之力居多

神道碑

三年阿哈瑪特領中書左右郎總司財賦每事欲專奏  
聞不關白省府詔廷臣議之公昌言曰分制財用古有  
是理不關預中書無是理也且財賦一事耳中書不敢  
言天子將親蒞之乎世祖曰仲謙言是也阿哈瑪特語



遂塞

神道碑

至元改元秋詔公行省事中興羌俗素鄙野事無統紀  
公求蜀士爲人僕隸者得五六人援恩例理而出之俾  
通明吏教以案牘旬月之間樞機品式粗若可觀羌人  
始遣子弟讀書土俗爲之一變又疏唐來漢延二渠溉  
田千萬餘頃民至今賴之

神道碑

三年還朝諸勢家告言有戶數千當役屬爲私奴朝議  
久不能決公言奴與良法當以乙未戶帳爲斷若已籍  
爲奴或奴之而未占籍者歸勢家可也自餘皆國家良



民必無爲奴之理其議遂定至今守以爲法

神道碑

五年春淄川妖人曰胡王者作亂惑衆逮繫百餘人事聞世祖命中書省議公謂愚民無知爲所誑誘殺首惡三數人足矣丞相安圖是其言命公與斷事官布哈泣決于濟南旣至尸三人于市餘並釋去人以爲死而復

生

神道碑

七年拜大司農卿立諸道勸農司巡行勸課敦本業抑游末設庠序崇孝弟不數年功效昭著野無曠土栽植之利遍天下奏開藉田祭先農先蠶皆自公始尋又奏



立國子學詔以魯齋許公爲祭酒選貴胄子弟教養之  
所成就人材爲多已而分布省寺臺閣往往蔚爲時望  
達于從政皆出公始終左右之力

神道碑

阿哈瑪特當國擢民鐵鑄爲農器厚其直以配民創立  
宣慰司行戶部于東平大名不與民事惟印楮幣諸路  
轉運司怙勢作威害民干政莫敢誰何公屢于世祖前  
極論其害詔從公言皆罷之彼怒其沮已數欲中傷賴  
世祖眷知有素計不得行

神道碑

十三年拜御史中丞時阿哈瑪特威權日盛恣爲不法



慮臺憲發其奸奏罷諸道提刑按察司以撼內臺居數

日公奏復之

神道碑

十四年拜昭文館大學士領太史院事初世祖以大明  
歷歲久寢差詔魯齋許公太史令王恂同知太史院事  
郭守敬測驗改正命公董其事歷成賜名曰授時頒行

天下

神道碑

十九年拜樞密副使首議肅兵政汰冗員選練將士而

優恤其家曾未及施而一疾不起

神道碑

初大理之役我師至其城下國主高祥拒命殺我信使



一日遁去世祖怒欲屠之公與太保劉公左丞姚公入  
言曰殺使拒命者其國主耳非民之罪世祖從之特免  
殺掠所活者無算漢鄂之役王師方啓行公與劉公姚  
公數言王者之兵有征無戰當一視同仁不可嗜殺世  
祖曰保爲卿等守此言旣入宋境諸將分道兼進各遣  
儒士相其役禁戢軍士毋肆殺戮毋焚燒廬舍所獲生  
口悉縱遣之其後混一之功卒本於不可嗜殺等語信  
乎仁人之言其利溥哉

神道碑

公爲人謙恭篤實外和內剛其好賢樂善出於天性人



有寸美必極口稱道遭際以來每以薦達士類爲己任  
或曰人心不同豈能盡識一有不當得無累乎公曰人  
才何嘗累己第患鑒裁未明有遺才耳且人臣以薦賢  
爲職豈得避纖芥之嫌而負國蔽善乎一時聞人敷歷  
中外者多公所舉然未嘗有德色平居慈祥樂易與人  
交不立崖岸及當官論事守正不倚毅然有不可犯之  
色又勇於爲義苟一事可行一善可舉如梗茹在胸必  
欲快吐而後已重農事及銓法謂生民之重本有國之  
大計尤拳拳焉樂聞已過僚屬或相規勸雖其言甚切



自敵以下宜若不能堪者公每優容之過亦隨改不少  
客晚歲篤於義理之學摳衣魯齋求是正之有自得之  
趣無他嗜好惟聚書數萬卷而已身居貴寵自奉若寒  
士門無閹隸客至倒屣出迎惟恐不及人以是多之

碑

神道

世祖始居潛邸招集天下英俊訪問治道一時賢士大  
夫雲合輻輳爭進所聞迨中統至元之間布列臺閣分  
任岳牧蔚爲一代名臣者不可勝紀至其愛君憂國忠  
勤匪懈好善疾惡始終不撓若時政之臧否生民之利



病知之無不言言之無不盡曾不以用舍進退累其心

者公一人而已

神道碑

嘗觀于世祖之世矣自其在藩至於卽位文武小大之臣乘運以興者各以職事見功業求其恟惴深厚知爲國之本造權輿於屯昧不寧者於公見焉太保劉公學術通神明機算若龜策其所以爲上計者審矣當是時軍國之重則有宗親貴人而書記征伐之責取才金氏之遺而有餘也乃獨薦公爲謀臣在上左右主儒者使陳先王之道雖若迂於智數而世皇信用以一天下而



貽子孫無彊惟休其迹無得而名焉嗚呼自孔子孟子  
後豪傑各以其資奮而內聖外王之學千百餘年無能  
道之者生民況得被其澤乎宋儒始有以遠接其端緒  
而朱子爲能集其書之大成然猶以是取怪時人身幾  
不免自其學者誦而習之亦或莫究其旨許文正公衡  
生乎戎馬搶攘之間學於文獻散逸之後一旦得其書  
而尊信之凡所以處己致君者無一不取于此而朱子  
之書遂衣被海內其功詎可量哉夫孰知先後扶持時  
其進退久速使其身安乎朝廷之上而言立道行者公



實始終之也。嗚呼微朱子聖賢之言不明于世微許公朱子之書不著于天下微公則許公之說將不得見進于當時矣。庸非天乎？中統建元以來政術與時高下獨成均之救彝倫大農之興稼穡歷象之授人時此出公之所爲皆隱然而有不可變者。詩云樂只君子邦家之基其公之謂乎。

蜀郡虞公  
撰新塋記

臣  
劉鳳誥恭校







